



С (Комм)  
Л 70



Василий Лодыгин

# МИЧА ЛУН





Василий  
Лодыгин

# МИЧА ЛУН



*Кывбуръяс*

*Поэма*

Сыктывкар  
Коми книжной издательство  
1986

84.3КО  
Л70

**Лодыгин В. Г.**

Л70 Мича лун. Кывбуръяс, поэма.— Сыктыв-  
кар: Коми книжнӧй издательство, 1986.  
88 л. б.

Василий Лодыгинлӧн тайӧ коймӧд книга, не кӧ лыддыны тшӧтш и челядлы «Вуграсьӧм» кывбурсӧ, кодӧс мичаа сернасалӧмӧн вӧлі лэдзӧма торъя книжкаӧн (1970 во). «Мича лун» книгаын Коми комсомоллӧн премияа лауреат В. Лодыгин ас ногыс пӧся восьтӧ сьӧлӧмсӧ коми лыддысьысь водзын: петкӧдлӧ асьыс муса, дона Эква йывсӧ, сэтӧн ӧлысь-вылысьяслысь думъяссӧ-кбсьӧмъяссӧ, сэтчӧс войтырыс-кӧд нэмӧвӧйся йитӧд-кутӧдсӧ. И ӧттшӧтш поэтыс зӧльӧ не воштыны син увсьыс ыджыд чужан мунымӧс, сылысь ӧтторъя мичсӧ, кылӧ ӧтувъя шог-гажсӧ, шудсӧ и дойсӧ. Поэт оз дзед бурӧ эскӧмсӧ: «О, кутшӧм ыджыд сыын шуд, Мый чужан мутӧ шаян кылан, Кӧть энж овлӧ сьӧд и руд, Тӧ сылан, сылан, сылан».

84.3КО

Л 4702290000-027 26-86 м  
М 128(03)-86

© Коми книжнӧй издательство, 1986.



Мыжа, мыжа ті водзын  
дыркодь бокрын олөмысь,  
Мыжа, мыжа ті водзын  
гежөдика волөмысь.  
Но со локті пыр кежлө  
тіян дорө, пуясөй,  
Ветлөдла со радпырысь  
аслам төдса туйясөд.  
Пасьтөдөй вай менө ті  
асланьд веж дөрөмөн,  
Да и сувта тіянкөд  
пармаьслөн шөрө ме.

### Дона серпас

Катшасинъяс йөктөны видз вылын,  
Ворсө налы тәрмасьөмөн чирк.  
Ачым весиг йөктышта и сыла,  
Кокньыдика ветлө пытшкын вир.

Кымөрыслөн паськьд еджьд дөрөм  
Пожъясьө со юын вель нин дыр...  
Кьдз нө таьсь, гортысь ветлөм бөрын,  
Кьдз нө таьсь менам гаж оз быр?..

### Шуд

О, кутшөм ьджьд сыын шуд,  
Кор асья зэрыс унтө босьтас,  
Да аддзан өшинювса луд,  
Кор өшиньястө гурйив восьтан.

О, кутшөм ьджьд сыын шуд,  
Мый аслад чужан муын олан,

Көн сёян совсö уна пуд,  
Но некор та вöсна он солась.

О, кутшöм ыджыд сыын шуд,  
Мый чужан мутö шаня кылан,  
Кöть енэж овлö съöd и руд,  
Тэ сьылан, сьылан, сьылан.

## Лов

Дзоридза видзьяс да расъяс,  
Енэжлөн вежласьысь сер,  
Кыа, кöть рытья, кöть асья,  
Пож ныр моз рудзалысь зэр,

Йöзыслөн серам да сьылöм,  
Киясын зэлалöм сөн,  
Мыш вылын косьмывтöм ньылöм,  
Пельясын уджыслөн звөн,

Мамöлөн небыдик кывъяс,  
Мусалөн мичаник нюм,  
Вокöлөн ышöдысь сывйыс,  
Быдлаö нуödлысь дум,—

Тайён и свет вылас ола,  
Татöг ме эськö эг ов.  
Мыйкö вот нöшта на колö,  
Абу на пötöма лов.

## Олам тани

Абу кокни öд кутчысьны тани,  
Ачым войыввса, тöдтöг ог ов.

Сувтан морёснад төлыслы паныд, —  
Вемыд көдзалө, непөштө лов.

Но со олам тай: чужлім өд тани,  
Водзө паськөдам батьяслысь вуж.  
Век на керкаяс тани жө панам,  
Век на татысь жө талялам юж.

Кышыд уджысь и кыныс тай сылө,  
Венө сьёкыдсө эбөса морт.  
Мед жө шөралө вёрыслөн йылыс  
Дөрөм выланым кыалысь от.

## Гортын

Мен ставыс дона тайө вольной светас,  
Көть енэж йирыс корсюрө и сьод.  
Ме төда: югдас гөгөр, шонді петас,  
И саймовтчасны шер ли, зэр ли, слөт.

И керка весьтті чикыш бара лэбас,  
И бобув бөрся вөтчас ичөт пи,  
И мамө бара коса меысь дзебас,  
Мед шойчышті, эг мудзты ёна ки.

Мен коса пыдди киам гудөк сетас,  
Код бөръя кадас дыркодь нин оз сьыв.  
И сэки, гашкө, кильчө вылө пета  
Да ворса «Чужн-быдми...» сьыланкыв.

И аслым, гашкө, сэки ме и шуа,  
Мый ставыс бур, кор чужанін он коль,  
Мый шудыс мортлөн сөмын чужан муас,  
Көн ставыс ас: и вөр, и видз, и ёль.

Кӧн, кӧдзан кӧ, то век нин мыйкӧ петас,  
Кӧн, сямман кӧ, то ставыс тэнад эм,  
Кӧн бательысь нимсӧ первой пи́лы сетан,  
Кӧн, морт кӧ вӧлін, помнитасны нэм.

### Чужан сиктын

Чужан сиктын век на колип сьылӧ,  
Чужан сиктын век на гӧрдлӧ вӧв.  
Чужан сиктын век на гудӧк кылӧ,  
Чужан сиктын век на войнас чӧв.

Век на пӧчӧ мича дӧра кыӧ,  
Век на небыд, век на чӧскыд нянь.  
Век на садьмӧ сиктӧй петук шыӧ,  
Век на кӧса новлӧ коми ань.

Век на весьтӧд тури кельӧб лӧбӧ,  
Век на олӧ вӧрын мойдса тун.  
Век на нюмсӧ нылыс зонмысь дзебӧ,  
Верӧс сайӧ бокиӧ оз мун.

\* \* \*

Висьтав чужан муӧй йылысь,  
Кӧні ставыс меным дона,  
Кӧні чужӧ мортыс выльысь,  
Кӧні тулыс дасысь вонас.

Висьтав чужан муӧй йылысь,  
Меным ылі му эн гарав.  
Сьыланкывъяс сьылам сылысь,  
Сьӧлӧмнымӧс шонтам бара.

Висьтав чужан муой йылысь,  
Көні мортлөн аслас кодзув,  
Көні мортыс аддзё ылысь,  
Көні сылөн ставыс водзын.

### Йитөд

Карын мортыс котөрөн и мунё,  
Сиктын сылөн воськов зумыд, стрөг.  
Сэни мортлөн чепсасьёмыс вунё,  
Быттё муас вужъясьёма гөг.

Гашкё, муыс эновтёмысь полё,  
Бокё йёзлы муннысё оз сет?..  
Ме ог тёд. Но сиктын пыр на ола,  
Эжва вожысь некытчö эг пет.

### Пилот

Ветліс дёмаса гачён,  
Вөлі көмтём век кок,  
Ворсліс ас вурём мачён,  
Сейліс кач сора рок.

Өні енэжöd лэбё,  
Өні мортыс — пилот.  
Эм тай сямлун и эбёс,  
Медым вуджны лёз от.

Менö гортланьö нуö,  
Көні сылөн тшөтш горт.  
Лэбам ас чужан муö  
Ичөтдырсянь кык ёрт.

## Габов грездын

Тасянь ылын менам Габов грездöй,  
Вочь ю бокын кодлөн керка рад.  
Сэни асыв руысь синсö мездö,  
Сэни садьмö челядьдырся кад.

Сэни мамлөн мөскыс лудö петö,  
Сэни узьö шондi водзын кань.  
Сэни биа сорснас петук летö,  
Сэни тöлысь — визув ышмöm чань.

Вочь ю кузя сэни пыжа катö,  
Вомас кутö мортыс кыснан сi...  
Рытнас вöли грездянь вель и матын  
Юква пуны бипур öзтам ми.

Коркö кывбур чужис бипур дорас,  
Лöня овны водзö мен эз сет.  
Габов грездöй бара дiнас корö,  
Аски муна, талун кö ог пет.

## Югыд шог

Сьөлöм бара югыд шогö уси:  
Мун пö, кöни югыд ваа Вочь,  
Кöни войяс шöпкöдчöны гусьöн,  
Кöни гудыр луныс овлö шоч.

Пельпом саяд лазйөн кай пö дөрö,  
Пуяс костöд сэтчö пö тэ кев,  
Кöни гажа яглөн кыпыд нöрыс,  
Сэсь пö аддзан тöдса керка вевт.

Сэн пö тэиö виччысьöны важөн  
Песка пач и мөвпөн тырём вой.

Сэсь пö тэныд сюрас шуд и гажыс,  
Сэн пö бурдас менö босьтöм дой.

Сьөлөм, сьөлөм, мен өд зэв жö колö  
Сэтчö, көнi ставыс важ и выль.  
Но вай аслад югуд шогөн олышт:  
Коркö тэкöд гортö ветлам збыль.

## Лөнъ

Дзик ньöти абу талун төврутор,  
Оз весиг кыддзыс корнас кышакылышт.  
Тадз сиктöй луннас лөня олö-вылö,  
А гажмыштö кö — сöмын рытьядор.

И синлы öнi корсьысьнысö нем:  
Оз некод некөн петкөдчы ни вуджөрт,  
Дзик гөгөр сöмын керкаяссиянь вуджөр,  
Но казялан жö — олысь танi эм.

Со чомйысь понлөн öшөдчöма кыв,  
Со польö няйтö руксигтырйи пырис,  
И зонка тонö лукйысьсö со нырас,  
А кильчö помын польö дөмлö тыв.

Эз вöвлы танi быттö гым ни чард,  
Эз вöвлы танi быттö шогыс, дойыс,  
Эз быттö шерөн сьөлөм пытшкö койышт,  
Эз быттö олөм сiдзсö-й -тадзсö гарт.

Мед лөнъ кö, мед. Тан бушковыс оз ков.  
Мед танi енэж лөзөн нэмыс олö,  
Мед синъясысь эз тыдав дой ни полөм.  
Мед лөнъ кö, мед. Тадз, сиктöй, водзö ов.

## Вөрса ю

Ёна жö и лöптa тaтi юис,  
Кöни ваис гöгралö да гартчö:  
Гашкö, коркö йöра чукöр юис  
Да и сюрсö пыркöдалис татчö?..

## Мыр

Кöни помасьö вөр туйис,  
Кöни ёльлөн кыр,  
Визув ваö тошсö суйöм  
Пöрысиник мыр.

Тошкас — югыд-югыд мольяс,  
Сэни — шондi би.  
Пуксы, видзöд визув ёляс  
Да и шонты ки.

## Водз тулыс

Пöсь сьөлöм бара мулысь ловзьöм кылис,  
И таысь менам бара кыптис лов.  
Öд нюдзмöма нин леторослөн йылыс,  
Кöть мукöд войнас кывлö — кув да ков!

Со кильчö вылö петöма нин пöчö,  
И пöльö абу төвся кодъис руй.  
Со пийй чача-пыжлы парус вöчö.  
Мед кывтас пыжыс, кытчöдз лöö туй.

Таво тулыс оз нинөмөн торъяв,  
Сөмын водзджык тай воис вой муө.  
Весиг войяснас ышмөны шоръяс,  
Регыд керкаөй кылалас юө.

Весиг луд вылө лэдзисны вөлөс, —  
Оз жө пышйы өд кытчөкө ылө?  
Весиг ракалөн мичаджык гөлөс,  
Весиг катшаыс быттьөкө сьылө.

Меным окота сывны жө өні,  
Зэв жө окота котөртны сылань,  
Менө кызд пуөй виччысьө көнi,  
Кытчө петавны көсйысис нылан.

### Та вөсна и чужи

Бара баддыс келіс Эжва юө,  
Лоис лөзов енэжыслөн дөрөм.  
Чужан муөй, кыдза раса муөй,  
Со и садьмин унсьыд, сьөлөмшөрөй.

Нюжаліс нин виччысьөмла нырөй,  
Гашкө, мися, тулыс оз и воы.  
Ёна жө и гажөй сыысь бырө,  
Кодыр бокын, ылын көнкө олө.

Колө сійө, медым пані сьылан,  
Колө, медым вунөді ме войсө,  
Весьөпөрмөн медым эськө кылі  
Сэкса майөн вайөм шудсө-дойсө...

Медым эськө нинөмсө эг вунөд,  
Медым уджын сотчыны ме кужи.

Та вöсна öд öти мича лунö,  
Чужан муйö, тэ вылын ме чужи.

## Мича лун

А луныс мича жö и вöли:  
Лöз енэж,  
Шондi — синтö кунь.  
И дзоридз көрөн öвтис тöлыс —  
Му вылын сулалiс июнь.

Роддомысь кильчö вылö петi  
Да сэки аддзи тайö мич.  
И меным гöтыр тубрас сетiс  
Да шуйс: «Ачyd сэссия-й видз».

«Кöть дасöс!» — кужи збоя шуны  
Да гортлань сэссия мöдiм ми.  
Да, вывтi мича вöли луныс,  
Кор узис морöс бердын пи.

## Югyd зэр

### 1.

Весьтын югyd енэжыслөн сер,  
Югyd ваөн койö сиктöс зэр.  
Жöлöб помысь лэччö югyd шор,  
Югyдвежөн лоис керка дор.  
Öшинь улö петiс менам пи,  
Югyd мольяс кыйö сылөн ки.  
Югyd зэрсьыс пийö оз и пов,  
Югyd зэрсьыс сылөн кыпыд лов.

Пиёс корны ывлао ог пет,  
Югуд зэрьсыс быдмас сийо мед.

## 2.

Гожся зэрыс регуд оліс,  
Көтөдыштіс мулысь эж.  
А өд кызди радло лолыд —  
Ывла вылыс — вежсьыс-веж!

Гөгөр югдіс, гөгөр мича,  
Муніс гыма-чарда грөз.  
Енэжыслөн рудов ситеч  
Весиг лои лөзсьыс-лөз.

Өшкамөшка енэж шөрын —  
Мөдлапөлө вуджан пос,  
Быттьо мичаник джодждөра  
Кодкө лэптис дуригмоз.

Ссылө пыста, сьылө колип,  
Содтіс сьылан горсө шор.  
Уна жө и радлун колис  
Талун гөстьөн шуантор.

## 3.

Енэж сөстөммис чардыс бөрын,  
Дугдіс пуяссө летны төв.  
Пырис зонпосни гуран шөрө,  
Найөс өнітө — өв не өв.

Енэж-му костө чикыш петіс,  
Мунөм чардыс моз вөчис вирд.  
Югдіс вочасөн вольной светыс,  
Да и бырсмуніс шонді дзирд.

Олан гыяссö кути́с юны  
Ошкамõшкалõн сера вõнь.  
Нõшта мичаджык лои луныс,  
Пытшкас төрõди́с звõн и лõнь.

### Шонди петõм бõрын

Талун асывсянь. букшасис луныс,  
Керка õшиньяс бõрди́сны дыр.  
Весиг «дышсõ» мен дыш вõли шуны,  
Нинõм юрõ ни киõ эз пыр.

Но тай шондыс кõникõ вõлõм,  
Кыськõ петис на югзьõдны лун.  
Пыр и небзьышти́с, ловзьышти́с сьõлõм,  
Пыр и пышйис вом паськõдлысь ун.

Пиõй чачаяс кõрõбõ лõди́с,  
Õдйõ ывлаõ уйкнитны мед.  
Õшинь улõдным котравны мõди́с  
Куим гõгыля велосипед.

Югыд ывлаõ бõрсянныс пети́,  
Менам унзильõй быттьõ эз вõв.  
Пиõй, адзис да, гõлõссõ сетис:  
«Батьõ, гуляйтам. Бõрвылас сõв».

### Сы вылõ и ми

Броткõ пõчõ:  
— Абу дивõ зэрны,  
Енэж пасьта писькõдли́сны розь.  
Мортыс сэтшõм — весь овны оз вермы,  
Со и броткõ, куртны мый оз позь.

Сылы шуам:

— Мича кад на воас,  
Зэв на ёна мудзас ставлөн ки,  
Төвсө вуджмөн көрымыд быть лоас —  
Сы вылө и сиктас олам ми.

## Гожом

Озйыс шогмө нин чөсмасьём вылө,  
Сөмын тепйы, он таысь өд тшөг.  
Номлөн дзизгөмыс гөгөрбок кылө,  
Менсьым арлыдөс арталө көк.

Ёна радейта ассыным гожом:  
Гытөм юыслөн веркөслысь лөнь,  
Киө сибдалысь коля на пожом,  
Сюмөд гугыс кодь кыалысь вөнъ.

Муна кытчөкө — матө ли ылө,  
Юа сынөдлысь масө ли нөк.  
Номлөн дзизгөмыс гөгөрбок кылө,  
Менсьым арлыдөс арталө көк.

## Пример

Шонді ыпйө ыджыд жарөн:  
Эз на кымөр сайө вудж.  
И райкомса секретарөс  
Пөсьөдөма гожся удж.

Лөсьыда жө ытшкө-өвтө,  
Төдчө: киподтуйыс бур.  
Сиктса йөзкөд куртө-чөвтө,  
Зөрөд дорө вайө юр.

Йӱзӱс ышӱдӱ примерыс,  
Кыдзи гажа сьыланкыв.  
Весиг повзис локтысь зӱрыс,  
Косӱн колис лапта выв.

Кыптас талун уна зорӱд,  
Быттьӱ керка, тая и сӱн.  
Тадз жӱ эськӱ йӱзыс дорӱ  
Быд лун петавны и мен.

### Томъяслӱн страдна

Вольсалӱны турун удал зонъяс,  
Нывъяс зӱля топӱдӱны лӱдз.  
Видзӱдчӱны визув юӱ вонъяс,  
Сӱмын сӱтчӱ пырны зӱв на водз.

Зӱв на уна лӱччас талун пӱсьыс,  
Кытчӱдз зорӱд йӱрӱдзыс оз пыр.  
Сӱки лоӱ сьӱлӱм вылын лӱсьыд,  
Шудӱн сӱйӱ лоӱ чукийӱн тыр.

Позяс сӱки бузгысьыны юас,  
Шмонитӱмӱн позяс песны кыв.  
Но, а мыйӱн шондӱсӱ вой гуас,  
Позяс корсьны, кӱнӱ ветлӱ ныв.

### Томлун

Кыпӱдам каръяс и стрӱитам БАМ,  
Выльмӱдам, мичмӱдам мусӱ.  
Дедъяслӱн, батъяслӱн кодъ жӱ ӱд сям:  
Уджтӱгыс сьӱлӱмным кусӱ.

Миянлы ошкөм ни слава оз ков,  
Зілям, мед нюмъяліс луныс.  
Томлуныд некор эз нинөмысь пов,  
Томлуныд водзын пыр муніс.

Адресным миян — көн сьөкыд да жар,  
Ставыс көн пуөмөн пуө.  
Знамясө Ленинлысь, удж вылө яр,  
Томлун пыр выліті нуө.

### Коммунистьяс

Ме кута юрын сөмын сэтшөм висьтьяс,  
Көн Ленин — медся радейтана морт,  
Көн первой радын найө — коммунистьяс,  
И налөн туйөд мунө став народ.

И талун аддза: медся водзын сійө,  
Код коммунистөн шусьө да и эм,  
Код бурсө вөчө ачыс аслас киөн  
Да зільө, медым шуда вөлі нэм.

Эм коммунистлөн сөмын өти право,  
Дзик өти право — водзө мунны пыр.  
И буретш тайөн вына роч держава,  
Код вольной светсьыс некор дзик оз быр.

\* \* \*

Таво зэрыс ёнасө эз торкав,  
Турун пуктім — көть тэ ачыл сөй.  
Ки пыдөсьяс — быттьөкө нянь корка,  
Зэлалөма мускульясөн сой.

Мунлім водз, а гортö волім сёрөн,  
Сідзи зілим — весигтö он чайт.  
Талун чомөр — чөвтам бөрья зорөд,  
Мөвпаным нин — му да урожай.

### Видз вылын

Зіля чиркьяс сьылöны,  
Косаясным — тшöтш.  
Здукөн быттьö сьлöма  
Прамöй паськыд кöдж.

Зіля чиркьяс сьылöны,  
Юрьяс новлам — кеж.  
Зорөд кыптис вылö нин,  
Турун кос да веж.

Зіля чиркьяс сьылöны,  
Сьылöй, сьылöй ті.  
Мышкын паськыд ньылöмөн  
Гортö мунам ми.

Чиркьяс мыйкө лөнисны,  
Мудзисны жö, дерт.  
Рытья кья вөньюслөн  
Öдва тöдчö сер.

### Рыт

Муртса öзйис кья вөнью  
Лöзалысь вөр йылас,  
Рытыс лои сэтшөм лөнью,  
Быдсөн шöпкөм кыліс.

Шуис зонмыс: «Татчө лок».  
«Ачыд», — корис нылыс.  
Көнкө буткөдчис движок,  
Көнкө кодкө сьыліс.

Кылі, кыдзи кайис гы  
Берег вылө юысь.  
Кылі корлысь усьөм шы  
Керкадорса пуысь.

### Гожөм пом

Эз на заринас плавгысьлы арыс,  
Эз на юсьяслөн кельёбыс лэб.  
Пыр на төдчыштө шонділөн жарыс,  
Пыр на дөзмөдчө миянлы геб.

Водз на петнысө идрасьны йөрө,  
Эз өд кывлы на көдзыдлөн лов.  
Пыр на пестерөн довгылам вөрө:  
Тшакыд дышыслы сөмын оз ков.

Но өд тайө и шойччөмыс лоө,  
Гашкө-й, шойччөмнас некод оз шу.  
Регыд бара на страднаыс воас —  
Регыд чукөстас картупель му.

### Көдздөдіс

Шонтысьө кымөрын төлысь,  
Быттьөкө шаллясьөм пөч.  
Домтөг нин гуляйтө вөлыс,  
Зорөдө төрөдчис көч.

Керкаяс — кылань банён,  
Лэбулын сералё пес.  
Кодикö öшиньын паніс  
Сё пöлөс чукуля вез.

### Менам кад

Видісны менö бара,  
Сöмын ме лөг ог видз.  
Бурөдас менö арыс,  
Ышөдас сылөн мич.

Видöмыс нöшта лоас:  
Лөня өд ме ог ов.  
Арыс сэк бара воас,  
Кыпөдас менсьым лов.

Лөсьыд мен тайö кадас,  
Лышкыд кор вөр и ю,  
Пөрччөдө төв көть садөс,  
Көдзалө көть нин му.

Быдөнлөн аслас олём,  
Быдөнлөн аслас нэм.  
Кодлыкө тулыс колө,  
Меным жө — ар мед эм.

### Эновтны поэтьом удж

Оз артмы кывбур — дөзмылан жө эськө,  
Но колян — коркө воас бурджык здук.  
А мый нө лоас, овны быттьө весь кө,  
Кор гөран-көдзан кадас воас тшук.

Он, сэки асьтö некыдзи он бурöд,  
Сэк тэнö бытысь корас ловзьöм му.  
Кöть сэки этша шедлас кынöм нурыд,  
Кöть ун оз шедлы — кыв ни джын он шу.

А кывбур? Кывбур — сийö бытысь лоас,  
И сэнi лоас уна югыд кыв,  
Мый арыс лышкыд урожайöн воис,  
Мый сиктын кылö кыпыд сьыланкыв.

### Праздник

Дöбелькиöдз кöдзалис нин муыс,  
Кушмис важöн öшинювса йöр.  
Талун мамкöд капуста ми пуам,  
Ывла вылын сылөн чöскыд көр.

Топыд мачьяс вундалам нель пельö,  
Сэссия найöс пуан ваö — дзум.  
Бипур дорын бергалöны челядь,  
Сетан сёйны — чужöм пасьта нюм.

Мам оз көсйы талун стрөгөн лоны,  
Со и некод би дорысь оз мун.  
Ывла вылас мамлөн нюмысь шоныд,  
Ывла вылас талун праздник лун.

### Мамö воис

Мамö видлыны воис,  
Кыдзи олам да мый.  
Бара вайис тшöтш со и  
Сола тшак да и вый.

Ичөт пиёйлы вайис  
Чөскыд мырпом да оз.  
Пөчлы мездорас кайис  
Пиёй кысильёй моз.

Ставлы нимкодъ да долыд,  
Сёрни небыд да рам.  
Кутшөм сиктаным олөм,  
Меным висьталө мам.

Коді чужис да куліс,  
Кодлөн код серти пөв,  
Кутшөм вөлөма тулыс,  
Кутшөм виччыссьө төв.

Сөмын ас йывсьыс сылөн  
Кывйыс шуны оз сюр,  
Быттьө олө да сьылө,  
Быттьө ставыс нин бур.

Ме жө зэв бура төда:  
Мамлы овлө и шог.  
Сөмын, корны кө мөда,—  
Ог пө, пиукөй, лок.

Кытчөдз верма пө, вола  
Тадзтө видлыны пыр,  
Сөмын бура пө олөй,  
Эн пө көдзөдөй жыр.

Менам олөмын лоис  
Талун шуда зэв лун:  
Мамө видлыны воис,  
Гашкө, оз сэсся мун?..

## Меддона морт

Тайо му вылас ставыс мен дона:  
Эжва ю, парма йир, кыддза рас.  
Натог сьолөмөй некор оз шонав,  
Натог морөсам быттьокө тас.

Но и донасьыс-донаяс эмось,  
Медся донаыс му вылын — мам,  
Коді сетіс мен овнысө нэмөс,  
Коді сетіс мен овнысө сям.

Сэтчөдз сы йылысь гижа да сыла,  
Кытчөдз гөлөсөй менам оз быр,  
Кытчөдз вежөрта, аддза да кыла,  
Кытчөдз бөрсяныс гуө ог пыр.

## Меддона кыв

Көсйө шуны пиёй «бать»,  
Артмө ичөт мортлөн «ать».  
Думсьыс шуө эськө «нянь»,  
Но пыр артмө сылөн «ань».  
Тшөкта шуны пиы «рок»,  
Ышловзяс да шуас: «Йок».  
Но өд эм нин пилөн сям:  
Лөсьыда зэв шуө «мам».  
Шуө медся дона кыв,  
Таысь йөкты көть да сьыв.

## Эскөм

Оз трусөс аддзы письыс мам,  
Оз аддзы письыс дышсөс, вөрөс,

А эскö: лоас сюсь да рам  
И сувтас зумыда му шөрö.

Тан, гортас, ёнмас сылөн борд,  
Тан, чужан муас, кодлы колö.  
Да, ёна эскö дона морт  
И тайö эскöмнас и олö.

### Аскöд öтнамön

Вөр керкаыс киссьöма важön,  
И пес нин оз керъяссьыс пет.  
Но, та вылö видзöдтöг, гажа  
Тан, вөр пытшкас, артмыштöм 'эрд.

А вöрас кö пыдöджык пыран,  
То мыйыс тэд сэтысь оз сюр —  
То ельдöг тэ казялан дырön,  
То тыдовтчас гобйыслөн юр.

Но сöмын мöй вотöс мен колö,  
Но сöмын мöй колö мен тшак? —  
Ме татчö öд сы вöсна вола,  
Мед аддзывны рассö и яг.

Мед сынöдсö йөлös моз юны,  
Мед уджöдны сюсьджыка вем,  
Мед нöшта мен öтчыдысь шуны,  
Мый шудыс и таын тшöтш эм.

### Асыв

Позялём кокъяссö веськöдö пон,  
Вöлисти кысянькö слöймöма зон,

Бакөстис луд вылө вөзйысьысь мөс,  
Курөглөн чукөрысь прөстмөдчө лөс,  
Мельнича слань вылын шыалө ва,  
Енэжлань выныштчис турунлөн за,  
Чужөмас койыштіс ыркыдысь көш  
Мортыс, мед вермасьны мудзкөд лун чөж,  
Войбыдөн чукөртөм кывъяслөн дзу  
Кывбурөн ловзис, кыз ловзис жө му.

### Турунла ветлөм

Рөдтам-гөнитам, рөдтам-гөнитам,  
Кыкнан боксяньным — рас да рас.  
Мегыр увсяньным тільгун звөнитө,  
Лымсө серөдө доддын раз.

Кодкө радысла сывны горөдіс,  
Зэв и лөсьыда босьтис лад.  
Көнкө матын нин турун зорөдыс,  
Асьным чөвтлім ми коркө кад.

Со тай терем моз сійө сулалө,  
Эськө петис кө ещө тшын.  
— Эн на, ёртъяс, ті сэні кулалөй?  
Абу кодкө нин сэні кын?

Зіля турунсө вывсянь чапалам,  
Аттө чөскыд жө сылөн көр.  
Морөс кудйөдзным көрсө апалам,  
Мед эз пышйы нин сійө бөр.

— Вөрзим?!  
Вөрзимөй, гортлань мөдімөй!  
Өти вөла, кык, сизим... дас...  
Вөвъяс туйсө зэв бура төдөны,  
Ещө сылыштам мыйкө час.

## Йи вылын

А кӧдзыдыс! Мед морыс сійӧс лыяс,  
А оз кӧ лый, то чӧртыс нуас мед.  
Но йи куд улысь чери мырдӧн кыям,  
Кӧть сійӧ мырдӧн миянлы оз шед.

Мед морӧс кудйын шоныд дырджык оліс,  
Ми гыркйӧ лэдзам биа, курыд чай  
И сёрнитам, мый гортӧ мунны колӧ,  
Кӧть некод дыр на берегӧ оз кай.

Но чери жальӧн сідзи-й кольӧ юас,  
И шуам ми, мый кокным тан оз ло.  
Но кытчӧкӧ да чӧртыс бытысь нуас,  
Тэ сӧмын регыд, вуграсян лун, во!

## Тӧвся сикт

Кодыр тӧвъяс лимзалӧны-ссылӧны,  
Сиктын лӧня олӧны да вылӧны.  
Мед пӧ лымйыс эськӧ унджык сапкылас,  
Унджык ваӧн муӧдзыс пӧ лянкалас.  
Унджык жӧ пӧ сӧки муыс вичмӧдас,  
Тӧвнас ставлысь пызаннысӧ мичмӧдас.  
Эн тэ чайт, мый тӧвнас сиктын узьӧны,  
Тӧлыс сиктлы кажитчӧ зэв кузьӧн нин.

## Октябрь пом

Став корйыс кызлӧн гылаліс,  
Дзик пасьтӧм сьӧлӧмшӧр.  
Йи кутліс и бӧр кылаліс,  
И лымйыс сыліс бӧр.

И бара няйтсö куралам,  
И бара шлячкö слöt.  
И турипув на сюралö,  
И видз вылын на скöt.

Но регыд ывла ыркалас,  
Но регыд кутас йи,  
И енэж лымйöн пыркалас,  
И радöсь лоам ми.

Ми тадз жö радлам тулыслы,  
Кор воас төвлы пом:  
Öд томöсь ми, кыз шуласны,  
Кор кадыс выль да том.

\* \* \*

Кадыс петöма лун шöрысь,  
Тьötö ректö турун додь.  
Туруныслөн чöскыд кöрыс -  
Төвся луныс гожся кодь.

Бытьö воши лымъя эжыс,  
Лои дзоридзьяса видз.  
Бытьö сиктö шондi кежис,  
Вайис йöзлы гаж и мич.

Бытьö коса швичкö-сьылö,  
Бытьö зорöd сэн и тан.  
Бытьö окала ме нылöс  
Зорöd сайын, шондiбан!

Бытьö, веськөдчыштöм бöрын,  
Сунлам ваö ставөн — гузь...  
Чöскыд жö и турун кöрыс,  
Вод кöть додь шöрас да узь.

Лымйыс сапкө и сапкө, и сапкө,  
 Бөчө мамөлы чышкысян удж.  
 Тöлыс лэчыд жө, чужөмтө тшапкө,  
 Он кө лөнинө туй шөрсьыс вудж.

Но а челядьлы веськодь тай төлыс,  
 Кильчө помсяньныс гижтөны кыр.  
 Ме өд на кодь жө коркө дзик вөлі,  
 Гортө турдытөдз вөлі ог пыр.

Кадыс муніс тай, муніс тай, муніс,  
 Регыд лымйыс моз еждөдас юр.  
 Но өд томлунөс эг на ме вунөд —  
 Даддыс мен вылө оз өмөй сюр?

Тола вомөныс кыр йылөдз воа,  
 Сэссия шутөвта, аддзисны мед.  
 Тшөтш жө исковта. Лоас мый — лоас,  
 Еймөй, горулас воны көть сет.

## Пывсян

Куритчыссис пывсянлөн рыт помын,  
 Регыд петас гырксьыс бөръя тшын.  
 Лэччам сэтчө, медым лоны томөн,  
 Вежон кежлө бара содтам вын.

Пуан ваын небзяс мича корөсь,  
 Ок и бура швачкам сійөн ми.  
 Жарыс пырас пытшкө ырөш сорөн,  
 Яйным лоас быттьө пачын би.

Сэссия юлань горулыс ми тюрам  
Көдзыд ваён пальёдыштны юр.  
Челядь моз жё польскөдчам да дурам,  
Сьёлөм вылын лоё бурсыс-бур.

Гортё воам, мудзёмаёсь, дышөсь,  
Юам сөмын пузьөдөм на чай.  
Пөсялам да пөрччам вылысь кышөд,  
Тасманымөс личөдыштам да-й.

Ок и лөсьыд овны татшөм здукө,  
Лышкыд лолөн быдөн ея и цар...  
Тайө каднас пывсьө баба чукөр:  
Налы колис буретш небыд жар.

## Пач

Водзті ошки пывсян,  
Өні — свода пач.  
Зэв жө ылөдз кывсьө,  
Шуны кө нин тадз.

Пывсянтө он ваймөд  
Эштытөг быд лун.  
Паччөр вылад кайны  
Некор тай оз вун.

Ки-коктө кө ёнтө,  
Паччөр — медбур ёрт:  
Небыдика шонтас,  
Видзөдан — выль морт.

Ог нин шу, мый пачын  
Пусьө шыд и рок,  
Шаньга банйө рачын,  
Көвдум пөжө бок.

...Керка лэпти-дори:  
Сиктад сөмын тадз.  
Плитанае и сорөн —  
Тэчи свода пач.

### Эжөм керка

Керканымөс тьөскөн эжисны —  
Керканымөс быттьө вежисны.  
Өні байдөг быттьө пукалө,  
А өд водзті вөлі люкалө.  
Занавесьяс бокө мунісны,  
Гөгөр дзоридз радлө луныслы.  
Нюмдіс уна лыда олысьыс,  
Лоис унджык татчө волысьыс.  
Керканымөс дзикөдз вежисны,  
А өд сөмын тьөскөн эжисны.

### Вөвлөм вөлөга

Ой, лю-ли да, ай, лю-ли!  
Қоркө сөйлі пожөм ли.  
Вөлі кадыс да экма —  
Юлі кызлысь зарава.  
Водзө гижә сьылігмоз, —  
Сөйлі ёна коляоз.  
Эг ме вөв ни ен, ни туз —  
Сөйлі гөнян, сөйлі куз.  
Шомкор сөйлі, сөйлі ляз,  
Мачтөм сьөла — ыджыд таз.  
Ставсө сетліс вөр да ва,  
Ставыс вөлі меным ма.  
Өні вөлөгаөй мөд —  
Ньөбөмторйөн кынөм пөт.

Абу вөрө мунан лад —  
Ставлы, вөлөм, аслас кад.

## Көтi

Пыдди пукта кокни көтi —  
Комияслысь лөсьыд көм.  
Новла ачым, новлө гөтыр,  
Көть и абу мича рөм.

Кокыд быттьө ачыс нуө,  
Быттьө абу сәні нем.  
Он на ботияснад суөд,  
Көть и выныд уна эм.

Страдуйтiгөн көмыс лөсьыд,  
Вөрө мунны сiдз жө бур.  
Көть и уна лэччас пөсьыд,  
Коклы мудзөмыс оз сюр.

Жаль, мый көмыс регыд олас,  
Жаль, мый некытысь оз сюр:  
Аслам удача эз лолы,  
Йөзыд некодi оз вур.



# ЮАЛӨМ

## Победа

Эз некоді радлыны медав,  
А шудысла солькъясис вир:  
«Победа! Победа! Победа!» —  
Тадз горалис кумача мир.

Тадз горалис миян держава,  
И юргис сэк кывъяслөн свод:  
«Сөветскöй геройяслы — слава!  
Мед олас сөветскöй народ!»

И сэк жö державаным бöрдис,  
Көть крепитчөм вылө и ён:  
Йöз паметью гижöма гөрдөн,  
Мый воштим ми кызь миллион.

И öни на кырлалö дойыс  
И кырлалас, думайта, пыр:  
Öд нель वोся вир кисьтан бойыс  
Эз паметьысь вушйы ни быр.

Ок, сьöкыда вермöмыс шедис,  
И казътылам во бöрся во:  
И вермим мый врагöс — Победа!  
И ённим мый бöрас — Победа!  
И водзö мый мунам — Победа!  
Победалы помыс оз ло!

## Война эз волы

И бара тулыс чужан муам,  
И бара чужан муын май.  
И бара мылькъя Эжва юй,  
Коть лымъякодъ на шонді сай.

И бара сэтчө талун муни,  
Көн памятниклөн югьд бан,  
И пиос нуодны эг вунод,  
Ми орччөн сулалыштам тан.

Эз, война сиктаным эз волы,  
А мыйта гижөма ним-ов...  
Ме пины висътала мый колө,  
Мед сылөн вөрзыштас жө лов.

## Ветеран

Клубын рытъяснас томъяс йөктöны,  
Сэки муслунлы сьөлөм — жан.  
Гудөкасысьлы ворсны тшөктöны  
«Доли-шели» да «Шондібан».

Клубын рытъяснас дядьö пукалө,  
Сийö казтылө томлун кад.  
Коть и гөгөрбок важөн юкалө,  
Зэв на йөктыштны эськө рад.

Войөдз пальөдö муяс-ваяссö  
Важ бур гудөкнас клубын, тан.  
«Оз жö тöдлыны мед войнаяссö», —  
Ачыс думайтö ветеран.

Ылө-ылө коли кадыс тайө,  
 Кор ме вөлі ичөт, ныв кодь шань.  
 Чышка джодж и ватө вөлі вая,  
 Пырта пес и мыська тасьті-пань.

Ещё пывсян вөдита ме вөлі,  
 Алөйгөрдөдз ломта изья гор,  
 Медым ставлы төдчис көдзыд төлын,  
 Кынмыштан да мудзыд сюрас кор.

Ваймөм бөрын первой вөлі лэччас  
 Чойясыскөд первой жарас мам.  
 Сэссия вөлі ыджыд мамө чеччас,  
 Лэччытөдзыс ошкас менсьым сям.

Медся бөрын өтнам пывся чөла.  
 Менө босьтлө тайө кадас шог:  
 Мужик рөдыс, коді миян вөлі,  
 Война бөрас пывсьыны эз лок.

### Сыланкыв

И синваөй доршасьө кортөг,  
 И сьөлөмлөн сэтшөм жө сям —  
 А сьылөны бабаяс гортын,  
 И накөд жө лабичын мам.

Ме сьылансө первойысь кыла,  
 Дзик төдтөм мен нуөдан лад,  
 Но горш дінысь гөрөд оз кылав,  
 И курдөдө абутөм чад.

А сьылөмас — ӧтпырӧ муслун  
И бабалӧн медыджыд шог:  
Войнаыс со кодыр нин куслӧ,  
А верӧсыс пыр на эз лок.

Ой, колӧ-ӧ сьӧлӧмтӧ вины  
Да вӧрӧдны вурыстӧм дой?!  
Но, буракӧ, сьӧлӧм оз инась,  
Оз вӧвлӧмсӧ вунӧд ни войт.

Оз вунӧд и надейтчӧ гусьӧн:  
Эз вермы, дерт, лонысӧ сӧдз,  
Мый верӧсыс збыльвылӧ уси,  
Мый некыдзи асьсӧ эз видз.

## Вӧв

Вӧвлӧн кӧзяиныс фронт вылӧ мунӧс,  
Вӧвсӧ жӧ, гӧригӧн, сэтчӧ эз нуны.  
Вӧв дӧнӧ бать пыдди локтӧс сӧк пиыс,  
Слабиник вӧлӧ кӧть ичӧтик кийс.  
Юрсӧ век муланьыс коцыртлӧс вӧлыс,  
Сийӧс мед тӧрис и зонкаыс сӧлӧс.  
Тадзи и гӧрисны-кӧдзисны найӧ  
Серамӧн-синваӧн йиджтысьӧм майӧдз.  
Вӧвлӧн кӧзяиныс фронт вылысь воис,  
Гӧрӧктӧс чибӧйд, рад жӧ зӧв лоис.  
Важ мозыс сӧмын эз кыпты тай юрыс,  
Муӧдыс кыскасис вӧлыслӧн бурысь.

## Дед да внук

- Кӧн нӧ тӧнад кокыд, дед?
- Бӧр войнаыс тай эз сет.

— А тэ сылысь мырдён кор!  
— Ёні корны, пиё, сёр.

Тадзи, сюрё мыйён здук,  
Сёрнитёны дед да внук.  
Внуклы лыжи вёчө дед,  
Кыкнан кокнас ветліс мед.

## Подув

Керка пытшкын «та-та-та» и кылө:  
Ичөт пилён киас автомат.  
Ворсанторсё талун ньёби сылы,  
Со и мортыд вывті лоис рад.

Чайта, таын нинём абу лёкыс,  
Ворсёмыслён аслас подув эм:  
Мужик рёдыс, буретш миян вокыс,  
Рёдинаёс дорйылісны нэм.

## Ўшыбка оз ло

Кён атомной бомбаыс потіс  
Да йөзсө сьёд шомөдзыс сотіс,  
Сэн из вылө гижөма со:  
«Ўшыбкаыс сэсся оз ло».

Ўшыбка пө сэсся оз ло...  
Но мирсө со мыйта нин во  
Век повзьөдлө сійө жө США-ыс,  
Оз тырмы мөй муыс да ваыс?

Ўшыбка пө сэсся оз ло...  
Ми көсьям көть эскыны, но

Ракетаяс шотісны мусö,  
Мый олöмыс наысь и кусö.

Öшыбка пö сэся оз ло...  
А кöсийöны правдасö со  
Выль бомбаөн повзöдны тонö,  
Код виалö йöзсö нейтронөн.

Öшыбка мед некор оз ло!

### Фильм бöрын

Пежыс маскасö бара пöрччöма,  
Площадь весьтьясöd лэбö — «хайль!»  
Абу, тыдалö, налы мөрччöма  
Роч Магниткалөн крепид сталь.

Водзöс рочьяслысь босьтны кöсийöны,  
Кöть и вöсниджык налөн сюв.  
Ыджыд лöглунөн синъяс öзийöны,  
Бытьö сатшöма сэтчö тув.

Важыс вуні кö,— видлöй волыны,  
Ми ог горзöй, но тöдöй ті:  
Миян батьясным пыр на олöны,  
Выль салдатьяснас лоим ми.

### Ковмас кö...

Ме чайтлі: сьölөм пырысь-пыр и потас,  
Кор весьтöд мунас-утюжитас танк,  
Но кыпöдчылі муысь ме — пехота —  
Да шыбитлі граната, кöні бак.

Тадз вѳтлісны ме пытшкысь коркѳ полѳм,  
Тадз армияын песісны кык во.  
И тшѳктас кѳ мен зэлѳдчывны олѳм,  
То трусѳн, мамлы шуа, ог жѳ ло.

\* \* \*

И ѳні, и цѳрысьѳ-нѳмѳ  
Оз наметысь пышы ни вун,  
Мый ѳртгяс армейскѳйяс эмѳсь,  
Ме кодгяскѳд воштылі ун.

Кузь лымгясѳд кодгяскѳд келі,  
Сьѳд ваяслысь мерайті от  
Да велѳдчи лоны век смелѳн,  
Мед дорйыны Рѳдина-горт.

И лысьта ме веськыда шуны,  
И правдасѳ ньѳти ог торк:  
Ме накѳд разведкаѳ муна  
Кѳть талун, кѳть аски, кѳть кор.

### Кызьѳд нѳм

Кор мортыс яйсѳ жариттѳг на сѳйис  
Да корйѳн весиг яндзимсѳ эз дзеб,  
Эз тѳдлы, дерт, мый сѳтшѳм сьѳлѳм дойыс,  
И мѳвпнас югыд аскиѳ эз лѳб.

А менам тѳждыс — этша вылѳ — море,  
И уна вылѳ — быдса океан.  
Ме лунысь-лун пыр мыйкѳ вѳча-дора,  
Мед олѳмыслѳн югдіс чужѳмбан.

Век лёкыс-пежыс меным паныд муно,  
Войнаон бара грөзитчө со пыр.  
И главнөй төждыс кызьөд нэмса лунө —  
Мед ачыс олөм му вылысь эз быр.

Ме чайта тадзи: лёксө вермас бурыс.  
И локтысь йөзыс помнитасны мед,  
Мый сьөкыд ноп мен коркө нуны сюрис,  
Мый буретш ме эг мусө сотны сет.

### Бать да пи

Ме батьтөг быдми, пөт и тшыг,  
Ме быдми, рам и лукав.  
Ме лёксө төдлі, но эг тшык —  
Эг көнкөясын пукав.

И эм кө өні олан ру,  
То мамөй сийөс сетис.  
Да шөнтис менө чужан му,  
Да йөзлөн жалыс петис.

Ог омөльт батьөс ни ог ёр,  
Семья мортыс важөн,  
Но шуи, дозийөн пырис кор:  
«Ов ачылд аслад гажөн!»

Кор вольнөй светсө аддзис лов,  
Сэк коліс лоны дасьөн...»  
Ас йөзлы висьтасьны ог пов,  
Мый шуся Одя Васьөн.

Биис азыма керкасö сёйис,  
Вөлі яр, кыз тай тшыгъялөм зверь.  
Сиктым васö коть жуявтөдз койис,  
Весиг шомалис подувса кер.

Колис сы кежысь, вылас мый вөлі,  
Курыд синваён бёрдысь семья.  
Кытчö воштысьны трачкөдчысь төлын?  
Көні виччысьö коньөрөс ма?

Но өд сійөн и вынаось йöзыс,  
Мый оз энотны, шляка коть зэр.  
Муртса төдчыштіс асывнас лöзыс,—  
Ставөн кайисны пөрөдны кер.

Мыйён мычкөдчис сиктаным тулыс,  
Керка кыпалис важсьыс на бур.  
Вөлі пытшкөсыс ыджыд да гулыд,  
Сөмын син улö нинөм эз сюр.

Но эз ямлы тай йöзыслөн бурыс:  
Быдөн чуктөдіс верманатор.  
Тасьті-паньыд и паськөмыд сюрис,  
Лоис ведра и пяслаян вор.

Тайö паметъысь некор оз вунлы:  
Ме өд төдмалі йöзыслы дон.  
Быттьö памятник отувъялунлы,  
Керка сулалө мича да ён.

Вөлі баксөм кылас, —  
Шогө уясє дед:  
Сылөн карта вылас  
Некод шы эз сет.

Эз көть орлы йөлысь,  
Мөскыс тай эз ло.  
Оз нин мөдлапөлысь  
Рытгоровнас во.

Оз нин ю дор пөлөн  
Дедө зорөд чөвт.  
Гөтырыскөд йөлөн  
Оз нин кынөм пөт.

Челядые өд карын  
Овмөдісны жыр.  
Вотөсыдла арын  
Воласны и — жбыр!

Олоны сэн бура.  
Налы мөссьыд мый? —  
Магазинысь сюрө  
Йөв и нөк, и вый.

Веськыда кө шуны,  
Такөдны кө лов,  
Дедлы йөлыс юны  
Енасө оз ков.

Но өд быттё орис  
Сылөн сьөлөм вуж,  
Быттё шоньд сорыс  
Локтіс кыськө пуж.

Откодъ съдөн лоис  
Дедлы лун и вой,  
Быттьо кыськө воис  
Олөм босьтан дой.

Тадзи-й оліс-выліс  
Кувтөдз, гашкө, дед,  
Гөтырыс кө сылы  
Гөлөссө эз сет:

«Кутшөм бара шогысь  
Нөрпалан тэ сідз?  
Дугды вай, ен могысь,  
Көзаөс көть видз».

Шогыс пыр и бырис,  
Кыптіс ловнас дед,  
Быттьо гортас пырис  
Шонді да эз пет.

Лои лөсьыд, долыд,  
Кыськө петіс нюм.  
Мыйла нө эз волы  
Сылы татшөм дум?

Көзаыд, дерт, эськө  
Абу мөслы пөв,  
Но өд нөкйыс веськодъ,  
Веськодъ вый и йөв.

Медым сюра чөртысь  
Төлкыс кө оз ло.  
Карта пытшкад йөртан,  
Бакөстлас — и то.

Радлөмысь кор дугдіс,  
Шуис пөчлы дед:

«Турунсö ме пукта,  
Лысьтынысö — тэд.

Кöзаыдлы сюрас  
Туруныс и кор.  
Потша сылы бура  
Овны керка дор.

Йöв кö сетны мöдас, —  
Век нин кынöм нур.  
Кöза йöлыд, тöдан,  
Зэв на ещö бур.

Гашкö, внучка волас,  
Гашкö, волас внук.  
Кыз нö йöвтöг олас,  
Он öд ньöб быд здук?»

Дыр на кöза рöдöс  
Пöся ошкис дед,  
Кöть и сийöс тöдис  
Омöлика, дерт.

Гөгөрвоам коркö  
Сылысь оласног:  
Нэмөвöйсяторкөд  
Торйөдчыны шог.

Ловъя лолыс колö  
Мортлы сынöд моз.  
Сытöг — абу олөм,  
Сытöг — тыртөм поз.

## Вунӧдчис

Суседъясас Дарья тьӧт  
Совла эськӧ муніс.  
Пырис жӧ да ассыс вӧт  
Мойдіс. Солыд вуніс.  
Сэсса висьталіс, кызд мӧс  
Тӧрыт вайсис сылӧн,  
Кызди зятые вайис тьӧс  
Керка вевттьӧм вылӧ.  
Ошйысьыштіс, кутшӧм шань  
Гӧтыр ичӧт пилӧн,  
Кутшӧм пӧжалӧма нянь,  
Кодлӧн кутшӧм милӧй.  
Сьӧлӧм бурмытӧдзыс тьӧт  
Висьтасис да муніс.  
Лоис мортыс сейтӧг пӧт,  
Сідзи кӧ нин шуны.  
Со и гортыс. Орччӧн йӧр,  
Бипур ӧшинь улас.  
Бипур весьтын ыджыд пӧрт,  
Кӧні кӧчан пулӧ.  
Тьӧтлӧн быттьӧ тырис лов,  
Горасӧ оз шу нин:  
«Мен ӧд колӧ вӧлі сов,  
Медым кӧчан пуны...»  
Суседъясас Дарья тьӧт  
Бара совла мунӧ.  
Оз кӧ бара висьтав вӧт,  
Гашкӧ, оз нин вунӧд.

## Пыкӧд

Збыль, сарайыс, кӧн дедным пессӧ видзӧ,  
Тӧв пӧлыштас кӧ,— киссяс, сійӧ-й видзӧд.

«Да... — шуис дед. — Мед менö кöть оз янöд..  
Пес вылö разя, йöзсö мед оз лямöд».  
Но недыр мысти мыйкö лои ськöд:  
Дед, кисьтöм пыдди, сувтöдаліс пыкöд.

## Керка

— Нинöм керкасьыс меным, —  
Ёртсö вомаліс ёрт. —  
Важас нэм помöс вена,  
Ныма сійö мен горт.

Важыс сулалас дыр на:  
Вартан — кылö на звөн.  
Меным кувтöдзым тырмас,  
Выльыс ещö öд кöч...

Ёртыс шыасис воча:  
— Ме вот кыпöда со  
Батьлөн керкакöд орччөн,  
Лоö дась нин мöд во.

Батьлысь кыла ме гөлös,  
Кодыр кузсьыліс дед:  
«Батьлөн керка кö вöлі,  
Менам лоас жö мед».

## Прокö дед

Ичötдырö вола,  
Мöвпалыштны мед.  
Мекöд сэнi олö  
Пöрысь Прокö дед.

Другася ме сыкөд,  
Көть и абу ас.  
Сёрнитам ми кыкөн  
Кык да-й куим час.

Чери кыйны нулө,  
Көні джуджыд йир.  
Чөскыд юква пулө,  
Сёям сын да сир.

Босьтлө менө вөрө,  
Сыкөд ме ог пов.  
Кыйдөс юкө шөри,  
Кызди нянь да сов.

Нулө менө гортас,  
Пайдө кынөм нур,  
Менө, батытөм мортөс,  
Индө вөчны бур.

Ичөтдырө вола,  
Мөвпалыштны мед.  
Мекөд сэні олө  
Муса Прокө дед.

### Ворысьяс

Шег ыджада вөлі — мамө ньөбис гудөк,  
А зонмөн лои — паськөді баян.  
И мамө, гашкө, вөлі меысь шуда,  
Қор слабника ворсі «Шондібан».

И сэксянь пыр на корся мича шыяс  
И вывті рад, мен ладыс сюрө кор.  
Сэк быттьө менө катлөдлөны гыяс,  
Сэк пельпом сайын чужө быттьө борд.

А пиянлы оз некыз сюр на ладыс,  
Көть гудөкөйлысь босьтисны нин лов:  
Өд ичөтикыс ветлөдлө на садө,  
И ыджыдыс эз дасысь унджык ов.

Ме налы гудөк бурджыкөс на босьта,  
Мед велөдчасны кыны югыд висьт.  
Кыз нывъясыдлысь сьөлөмъяссө косьтан,  
Он гудөктө кө некымынөс кисьт?

### Коркөся пес вөчөм

Ок, пилаөй, мый тэкөд лоис?  
Өд абу на дзик пиньыд ныж.  
Час мысти мамө вөрысь воас,  
А пессө вөчим сөмын — гыж.

Вай, зонмө, сюсьджыка тэ шурөд,  
Өд абу чорыд пипу краж.  
Тэ ёна бөръя кадас дуран,  
Дзик быттьө челядь, көть и важ.

Тэ жалитышт көть муртса менө,  
Өд кокөй кынмө — көмам розь.  
Вай өтув көдзыдсө ми венам,  
Мен некыз висьмыны оз позь.

Мен вала ветлыны на колө,  
А тэкөд век на мырся со.  
Ми мамкөд өткөн дзик өд олам,  
Тэ тайөс, өртөй, гөгөрво.

Мам йизьөм паськөмөн пыр воө,  
Пыр сөрөн воө — пемдандор.

Тэ думышт, кутшөм гажа лоö,  
Кöрт пачсö рытнас ломтам кор.

Ми гоз-мöд картофель сэк пуам,  
Ок, чöскыд, көть и абу сов.  
Пув коръя чай на ещö юам,  
Зэв лöсьыд сэки — ов да ов.

Ок, пилаöй, мый тэкöд лоис?  
Öд пескыс зэв на этша со,  
А регыд мамö вöрысь воас,  
Ме отсöг сылы — гөгөрво.

### Пилöн челядьдыр

Келалöма няйт гуранъяс шöрти  
Менам пиöй, мамыслöн «сёшайт».  
Бытьö сийöс купайтöма чöртыс —  
Юр вывсянныс кок улöдзыс няйт.

Ньöрийöн эськö. Сöмын стрöглун орö:  
Эг жö этша коркö няйтсö кый.  
Юали ме пилысь серам сорөн:  
«Талун порськöд узин али мый?»

Тöдö: мыжа, сийö синсö тильö,  
Бурөн мынны, тöдöмысь, оз чайт.  
Шуи сылы: «Вежсьы, пиö, зiля,  
Сэсся тэкöд книга лыддям вай».

Ог жö нöйт ме сийöс мыйöн сюрö,  
Ог жö сийöс омöль кывийöн ёр.  
Пиöс ассьым велöда ме бурөн,  
Медым сысь бур жö лоис морт.

## Муслун

Лок жö, лок жö, дона пиöй,  
Мый нö чабыртöмүд киад?  
Ок и муса тэнад нюм,  
Мед оз тшыкöд ковтöм дум.  
Лок жö, муслуннымлөн чужас,  
Тэ öд ветлöдлыны кужан.  
...Вуджим гöтыркöд ми пос —  
Сöмын му да енэж кост.

## Войын

Муртса войнас кызöктыштас пиöй —  
Небыд шебрас лöсьöдыштас киöй.  
Эскöй меным — шудыс ыджыд тайö,  
Горшад быдсөн мыйкö весиг кайö.  
Воас кад и коркö бытысь кула,  
Водтöдасны менö кыз му улö.  
Гуö сүйтöдз сэки менам пиöй  
Лöсьöдыштас дöра аслас киөн.

## Гöтыр йылысь

Мый сылы коліс, томөн вöлім кор?..  
Мед сійöс мунны кытчöкö ме кори,  
Мед вöлі ю, а этша вылö — шор,  
Мед вöлі видз и сэні уна дзоридз.

Мед вöлім мирас сöмын кыкөн ми  
Да весьтöд лэбысь дзодзөгъяслөн көлысь.  
Мед сьөлöмысь эз куслы öзйöм би,  
Мед водзын ставыс югыд, сöстöм вöлі.

Мый öнi колö, олöм шөр нин кор?..  
Мед удж вылö ме мича юрөн петi,  
Мед локтi гортö, вöли водз кöть сёр,  
Мед воча кывйöс веськыда дзик сетi.

Мед ыджыд пилысь видлi гортса удж,  
И ичöт пилы, аддзи кад да, мойдi.  
Мед вошöм морт моз олöмсö эг вудж,  
Мед вöчи бур, кöть кодкö менö дойдис.

Мед индö, мед. Öд сы вылö и эм.  
Мед тшöктö мен, мед туяси да корси.  
И аттьö лыддя енмыслы ме нэм,  
Мый дона мортөн коркö ме эг сорсы.

## Друг

Менам вöли муса друг — Степан.  
Мекöд тшöтшъя. Овыс Тарабукин.  
Орчöн вöлим ськöд сэн и тан,  
Шудсö-шогсö сылөн кувтöдз юким.

Сöмын öтчыд сюрлис юктöмтор:  
Ми эг вермöй юкны öти нылöс.  
Вöли тайö, велöдчим на кор,  
Но зэв пöся сьölöмөн нин кылим.

Морöсаным кутчысим сэк ми,  
Бытьö врагъяс вийсян косьö петим.  
Синмысь быдсөн чепöсйылис би,  
Öта-мöдлы ныраным кор сетим.

Важөн абу ловъя дона морт —  
Томөн-ёнөн йи куд улö сюрис...  
Эм-ö кöнкö сыысь шань да бурыс  
Вöльной светас менлы вылö ёрт?..

## Бур вöчысьяслы

И бөръяысь нюмъялас луныс,  
И бөръяысь мөвпалас юр...  
Но сыөдз ме найөс ог вунөд,  
Код вöчліс мен олігам бур.

Код синваөс чужöмысь косьтіс  
Да бурөдіс: «Тырмас жö, шань».  
Код өдзөссö таркөдтөг восьтіс  
Да ыджыда шöрыштліс нянь.

Код дөрөмö кизьяссö вурис,  
Код дөмыштліс роимунöм гач.  
Код шылькнитліс куделя юрөс  
Да сетліс мен дөраысь мач.

Ок, сьöкыд жö свет вылас олөм,  
Кор батытөм, и висьөдчö мам...  
Ме сьөлөмлөн измöмысь полі,  
А сійö өд шензьымөн рам.

Вай лэдзöй жö ставныслы шуны,  
Код олігөн вöчліс мен бур,  
Мый кувтөдз ме найөс ог вунөд  
И на водзын копырта юр.

## Больничаны

Збодерөн ме көсйи нэмсö лоны,  
Мися, меö висьöмыд оз пыр.  
Кусыньтіс тай. Ковмис таөдз воны,  
Төдмавны и больничалысь жыр.

Ичөтдырсянь гөчöй эз и ёнмы,  
Быдмигчөжым эг ме вöвлы руй.

Ошкылісны: «Востер тайö зонмыс»,  
Но эз мөдлы коскас ставсьыс суй.

Коса помысь ытшкигъясад вөлі  
Ёна мудзан. Рытнас быттьö мыр.  
Батьтөг оліг, уна уджыд сөліс  
Да и öні эз жö быттьö быр.

Врачлы, менсьым юасьö кор вөлі,  
Дерт, ме нинөм висътавны эг мөд:  
Гашкө, мися, кынтіс көдзыд төлыс,  
Гашкө, мися, татшөм миян рөд.

### Пожөм

Нэмөс шензыны олігам мөда,  
Нэмөс бурсьыс и лөксьыс ог пөт.  
Гашкө, пожөмөй, муні тэ рөдө? —  
Мен со колö жö зэрыс и слөт.

Зэрыс — быдмыны, вужъясьны муас,  
Слөтыс — вермасьны лөкыскөд век,  
Медым, бушков кө төдлытөг суас,  
Кызд көть куснялас, некор оз чег.

### Көсийөм

Меным окота варышөн лоны,  
Медым видлыны, крепыд-ö борд,  
Төдны, кутшөм жö лэбөмлөн доныс,  
Кывны борд улысь төлыслысь гор.

Меным окота пожөмөн лоны,  
Медым төдмавны муыслысь вын,

Кыдзи тулысөдз төвсяньыс воны,  
Кодыр йывсяньыс вужйөдзыс кын.

Меным окота Эжваён лоны,  
Медым пөттөдзыс юктавны му,  
Медым быдмис и слабыс, и ёныс,  
Ичөт кага и пуыс, и сю.

Меным окота шондїён лоны,  
Медым пемыдлысь вештыны от,  
Медым быдлаын вөлі зэв шоныд,  
Медым нюмъяліс му вылын морт.

### Личөдіс

Сьөлөм висьө, вель чорыда висьө,  
Но со лөсяліс висьөмас кост.  
Вөлі ловъя ли кулөма нисьө,  
Талун радла ме зонпосни моз.

Радла сыысь, мый нёрпавсис бара,  
Бара лоис на олөмын лад.  
Радла сыысь, мый локтөма арыс —  
Менам меддона, медмуса кад.

Радла ю дорын, чери мый сөйө,  
Радла вөрын, мый вотөсыс эм.  
Вуні менам став шогыс и дойыс,  
Кодъяс сөйөмөн сөйөны нэм.

### Востым

Быттьө востымөн томлунөй вирдыштіс,  
Быттьө вөлі син лапнитөм кост,

Усьысь кодзулөн быттьокö дзирдыштіс —  
Оз нин бергöдчы некор, оз кос.

Быдтор олöмам вöлі жö эськö да:  
Он öд ангелөн мортыд тай чуж.  
Но ме синъясөн видзöда веськыда,  
Мортлы лёкторсö вöчны ог куж.

Биын сямöд моз шогöйла гартчылі,  
Весиг нöйтлісны: туйсьыд пö кеж.  
Но ме томлунöс,  
Талань кö вартчыліс,  
Эськö мöд вылö некор эг веж.

\* \* \*

Вида ачымöс сыысь,  
Мыйла повлі ён гыысь,  
Веськыд туй вылысь кежлі,  
Сетöм кывъясöс вежлі,  
Дышөн корсюрö овлі,  
Унджык вöчöмысь повлі,  
Киöс мустöмлы сетлі,  
Гортас гөститны ветлі,  
Муслун йылысь кöть дольлі,  
Чужан местаöс кольлі.  
Но ме нинöм эг гулы,  
Ставсö веськыда шулі.

### **Узьтöм вой**

Войыс дженьыд и кузь,  
Кодыр мөвпавны колö.  
Войбыд, ёртъяс, эг узь,

Асья кыаөдз олі.  
Ассым юалі ме:  
«Мыйла свет вылас чужи?  
Дойсө чукөртны мед  
Лиbö водзсасыны кужны?  
Вөчны йөзыслы бур  
Лиbö кодөскө пурны?  
Төлкөн уджөдны юр  
Лиbö ылөсас дурны?»  
Аслым шуи ме сэк:  
«Дойыс унакодь сюрлі,  
Но тэ уджалін век,  
Олөм чөжыд эн дурлы.  
Босьтін колана пас:  
Лөклы паныдыс мунап.  
Көть и нөйтысьыс дас,  
Повтөг тышас век сунап.  
Өні чорзёма кос,  
Өні бан бокад вурыс.  
Он кө вөчыштлы кост,—  
Ещө ёнджыка сюрас».  
Лои ас вылө скөр —  
Артмө: лөксьыс ме пола?  
Сідзкө-й, водзө ог дзөр,  
Татшөм этшөн жө ола.

## Юалөм

Вермасны-ө лоны сэтшөм кывъяс,  
Медым шуны, кутшөм дой ли шуд?  
Вермасны-ө лоны сэтшөм нывъяс,  
Медым эськө коскөдныс эн кут?

Вермасны-ө лоны чужан муяс,  
Көні сьөлөм вөлі эськө кын?

Вермасны-ө лоны сэтшөм юяс,  
Кыті мортыс өніөдз эз сын?

Вермасны-ө лоны сэтшөм вояс,  
Медым шудыс сөмын вөлі сэн?  
Вермасны-ө лоны сэтшөм дойяс,  
Кодөс мортыс өніөдз эз вен?

Вермасны-ө сэтшөм йөзыс лоны,  
Медым налөн эз и овлы мыж?  
Вермасны-ө сэтшөм лунъяс воны,  
Медым бырис олөм вөсна тыш?

### **Вөр-ва вөсна**

Ми ставным өні өта-мөдлы лөвтам,  
Мый гөльмө ю, мый гөльмө парма йир,  
Но черисө, оз позь көть, век жө көвтам  
И вөрса зверлысь кисьтам югыд вир.

Ме абу ставлы индалысь да шуысь,  
Но пола зэв, мый лоас татшөмтор:  
И йөршыс весиг бырас миян юысь,  
И вөрысь ми ог вайөй сьөла борд.

### **Йөрапи**

Гашкө, енмыс миянөс нин ёрө,  
Мыйла лоим зверьяс кодьось ми:  
Парма шөрысь локтіс кильчө дорө,  
Сиктысь мамсө корсьө йөрапи.

Веськөдчылас коньөр мөсьяс шөрө,  
Но оз сэтысь мамыс сылы сюр.

Көсъяс пырны кукань дінө йөрө,—  
Потшөс костө сибдө сылөн юр.

Ветлас корсьны мамсө ю кыр йылысь,  
Но оз тöлыс сылысь дуксө вай.  
Мамсө важөн жаритлісны сылысь,  
Вина сорөн кылөдлісны яй.

Йөрапиыс чайтө: мамыс сюрө,  
Эз жө сійөс муса мамыс коль.  
Вай жө пышйы татысь ловъя юрөн,  
Мед эз вöчны кокъяс улө воль.

### Морт да ю

Сьökыд мортлы öткодьөн пыр лоны,  
Лөнълөм бöрын сійө овлө ёсь.  
Эжва юлөн уна жө со вомын,  
Уна йир, и уна визув косьт.

Дзикөдз косьмас либө вывті ойдас,  
Дзикөдз дышмас либө лэптас гы,  
Меліалас тэнö либө дойдас,  
Мойдас либө лэдзас скөрмөм шы.

Орчөдны зэв сьökыд морт да юөс,  
Но öд öткодь весиг олан ныр:  
Васө юыс водзө кө пыр нуө,  
Мортыс сідз жө водзө муно пыр.

### Олөмыс — тыш

Тэнад олөмыд сөмын öтчыд...  
Медым ылөсас век эн уй,

Водзын мунысьяс бөрся вөтчан  
Лиbö мукөдлы индан туй.

Зарни дона көть өти здукуыс,  
Коді мөдысь оз некор лок,  
Сійөс ёртлы и враглы юкан,  
Медым му вывсьыс бырис лёк.

## Ош

Абу лөсьыд, ошлы кө тэ сюран,  
Көть и сійө, он кө вөрзёд, рам.  
Сылы зэв жө дона гөна юрыс,  
Сылөн эм жө мыйтакө да сям.

Но а мортлы, коді ошкө пөрис,  
Колө шуны крепыджыкөс кыв,  
Медым сійө омөльджыка сөрис,  
Медым төдіс, көні ув да выв.

Дзыкөдз сійө вельмис ошлөн куас,  
Сы водзын тэ — абу морт, а ном.  
Веськыда кө быттьө мыйкө шуан,  
Равөстас — и тупкас тэнсьыд вом.

Вай жө өтув ошлы паныд сувтам,  
Тані өткөн этша вөчан мый.  
Пежлы паныд тышсө нуам кувтөдз,  
Оз өд ачыс сійө морөн лый.

## Вөвъяс

Тышкөдз волöны видз вылын вөвъяс,  
Медым пөвнысө некод эз ну,

Медым сы дінө некод эз көвъясь,  
Медым шудлунсö некод эз гу.

Öта-мөдныслы зяткасны бокас,  
Öта-мөдныслысь кисьтасны пинь.  
Но и уна жö скöрыс да лёкыс,  
Быдсөн сьавкйö сэк синсьыныс кинь.

Ёныс вермысьөн косьясын петö,  
Слабыс вунөдö сыланьö туй.  
Слабыс кодöскö аддзöдас сэтөн,  
Кöни сыысь на кодикö руй.

### Бобув

Муніс кымөр. Сэссия дзикөдз кобис.  
Енэж шöрын артмис лөзов эрд.  
Дзоридз вылö пуксис мича бобув,  
Бордъяс вылас уна рöма сер.

Нимкодясьö, дерт жö, шондi улас,  
Радлö, мый и сылөн шудыс эм.  
Оз и тöд, мый аскинас и кулас:  
Зэв öд дженьыд бобулыдлөн нэм.

### Пос

Сиктсянь матын оліс-выліс  
Пуысь вöчöм пос.  
Сьöкыд уджысь шойччöм вылö  
Этша сюрліс кост.

Сійöс пунктисны зэв пыдди  
Йöз и весиг скöt.

Ордлыяссө быдөн лыддис —  
Абу весиг тшөт.

Висьмис поскыс бөръяпомыс  
Да и сетис лов.  
Орччөн кыпөдісны томөс —  
Ветлы да эн пов.

Важсө регыд трактор нуис —  
Пескөн лои пос.  
Поскыс вөсна шогсис юыс  
Да и лои кос.

### **Көдзысь**

Бара тулыс меным воис,  
Бара гөри йөзыс моз.  
Кутшөмөн нө лоө воыс?  
Мыйкө быдмас али оз?

Гөрөм му пөлөныс жөдза,  
Видзөдала тат и сэт.  
Часлы, шобді талун көдза,  
Аслам няньөн олі мед.

### **Вуграсьысь**

Талун медся визулінас сыні,  
Көні юсө ляпкөдөма косьт.  
Шедлі ком, но вугыр йывсьым мыні,  
Тыдалө, эз самсө бура босьт.

Вель нин уна чери тадзи муніс,  
Ёна жö ме вуграсьысьыд шань.  
Мыйта эськö юква позис пуны,  
Мыйта позис вöчны черинянь.

\* \* \*

Парма шöрас дыр нин олі,  
Лэчкаси да мый.  
Кöть и быдлаö дзик волі,  
Унасö эг кый.

Нопйын сöмын гоз-мöд сьöла,  
Сійö эм — и то.  
Кыйны эськö сюрö вöлі,  
Но эз сямöй ло.

Но öд коркö вöрсьыс пета, —  
Нопйöй лоö тыр.  
Оз öд ставыс вöльнöй светас  
Артмы пырысь-пыр.

## Пуяс

Кык пу ме быдті öшинь улын:  
Му помысь вайлі кыз да коз.  
Но кыддзыс вижöдіс да куліс,  
Эз вужъясь сійö козйыс моз.

А садитігас öд ме шулі:  
«Ме — коз, а кыддзыс — муса ныв».  
Кöть нывлөн чужöм вылын тулыс,  
Но мыйкö радлунсö ог кыв.

## Дөрөм

Вур мен, мамө, мича дөрөм,  
Сэтшөм дөрөм меным вур,  
Медым петі нывъяс шөрө  
Да век вылын кути юр.

Медым дөрөм вылас вөлі  
Эжва ю и сэн жө видз.  
Медым кывтіс весьтас төлысь,  
Содтіс дөрөмыслы мич.

Медым лэбзис дзодзөг көлысь,  
Медым зарниасис сад.  
Медым менам арөй вөлі —  
Вөльнөй светас медбур кад.

## Мичлун

Синмө шыбитчытөм мичлун,  
Но өд сійө кутшөм шань.  
Тэнад сійө ставлы вичмө,  
Кызди ставлы вичмө нянь.

Тэнад сійө ставсө шонтө,  
Кызди шонтө шонді-мам.  
Тайө мичсьыс сьөлөм ёнтө,  
Но оз тшыксьы олан сям.

## Кывбурлы подув

Көть кызди кымөсөс ог көр,—  
Оз артмы кывбур керка жырыын.

Мен колө көть нин матыс вөр,  
Мен колө көть нин шорлөн кырйыс.

Да нөшта өтнам вөлі мед,  
Да нөшта бипур трачкакыліс.  
И колипкай кө эськө сьыліс,  
То вывті бур нин вөлі, дерт.





## БАРА ВОССЬОМА ГАЗ

\* \* \*

Нывлөн мичлуныс бырö,  
Воймö мамөлөн шаль,  
Весиг гöраыс кырö,  
Весиг пöрысьмö сталь.

Ставыс нэм помсö кылö,  
Вошö надейтчигмоз.  
Ставыс быттьökö сылö,  
Сöмын öтитор — оз.

Ыджыд муслуныс олö,  
Абу дорыс ни пом.  
Сийö радуйтны волö,  
Кöни пöрысь и том.

Сийöс гуав кöть домав —  
Лэдзас быдлаö вуж.  
Эз кö муслуныс ломав,  
Эз и олöмыс чуж.

Виктор Савинöс лыддьöм бöрын

Шондйскöд бара талун чеччöма,  
Эжва дорö Виктор Савин лэччöма.

Мөвпалө, дерт, сійө мыйкө лөсьыдөс,  
Сыланкывтө бара, көнкө, лөсьөдө.  
Медым сійөс коми йөзыс сылысны,  
Медым сійөс ставөн сэсся кылісны.  
Гажаа мед вольной светас олісны,  
Өта-мөдлы мусмисны да колісны.

\* \* \*

Юргө ывлаын сылөм,  
Бара восьөма гаж.  
Гудөк бара на кылө,  
Көть и ёна нин важ.

Весиг кильчөяс вылын  
Пөрысь пөчьяслы рад.  
Сылөй, нывъясөй, сылөй:  
Тіян сэтшөм со кад.

Тіян сылөмныд сетө  
Мортлы олана лов.  
Мортыд таладор светас  
Некор сывтөг эз ов.

Шуда вөлі кө, — сылыс,  
Сылыс, личкис көть дой.  
Сыөн оліс да выліс  
Сылы сетөм лун-вой.

Лэбө сыланкыв ылө —  
Енэжтасөдзыс дзик.  
Сылөй, нывъясөй, сылөй:  
Кывзө тіянөс сикт.

## Йöктыштам да сылыштам

Бара восьті гудöк — няж!  
Йöктöй да эн усьöй.  
Вöчла тiянлы ме гаж,  
Ворсысьöн кö шуся.

Мыйкö дышöсь, нывъяс, тай,  
Эн вай пыксьöй стенас.  
Тэрыбджыка швачкöй вай —  
Кокныд оз на дзенав.

Кужанныд тай, кöчамач!  
Збодерöсь на вөлöм!  
Йöктö керка, йöктö пач,  
Радлö менам сьөлöм.

Мудзи ачым. Тырмылас!  
Йöктынысö олас.  
Частушкаяс ворса час,  
Кодлы кутшöм колас.

Пöсялі нин. Дөрöм брöд.  
Ыркöдышт вай, төлöй.  
Сьылöй, сьылöй. Ворса öд:  
Тiян пöвстын пөлöй.

## Водзті да öні

Водзті вöлі нылыд  
Гудöк шыö волö.  
Öні он тай ылöд,  
Öні баян колö.

Водзті чышъян сетін,—  
Вобыд радлас-сыйлас.  
Өні мода петіс:  
Дона пась мед вылас.

Гуляйтасны вөлі  
Зонкөд вөвъяс вылын.  
Өні веськодь вөлыд:  
Машина мед сылы.

Зонъяс сералёны:  
— Кытчө кутім воны!—  
Дона лои өні  
Верөсьясөн лоны.

### Менам тулыс

Меным колө сэтшөм тулыс,  
Медым вөлі зэр и гым,  
Медым радліс енэж улыс,  
А эз вуджрась көдзыд лым.

Меным колө сэтшөм тулыс,  
Медым кыпыд вөлі лов,  
Өшиньөдз мед Эква туліс,  
А эз гожея ваөн ов.

Меным колө сэтшөм тулыс,  
Кор тай кийн узьө ки,  
Кор тай зараватө юлам  
Кыддза расын тэкөд ми.

Меным колө сэтшөм тулыс,  
Коді гудөка и пом,  
Окасян кор льөм пу улын,  
Кор тай тулысыс кодь том.

## Мөдлапöлын — талапöлын

Мөдлапöлын — нывъяс,  
Талапöлын — зонъяс.  
Сэни — небыд сывъяс,  
Тани — лөсьыд вомъяс.

Мөдлапöлын — сьылөм,  
Талапöлын — ворсөм.  
Сэни сьөлөм сылө,  
Тани — петө ортсө.

Сэтчө вуджны колө,  
Татчө вуджны колө.  
Мөдлапöлыс — полө,  
Талапөв — чөв олө.

Абу пыж ни пелыс,  
Юыс паськыд, джуджыд.  
Часлы, ачым кела,  
Часлы, ачым вуджа.

## Ру

Му весьтын и вөр йылын,  
И матіник, и ылын,  
И тэнад пельпом вылын,  
Дзик гөгөр вөлі ру.

И кажитчис, мый руыс  
Ме дорысь тэнө нуас,  
Сідз, босьтас да, и гуас,  
И тэнө ме ог су.

Ог аддзы, кыті мунін,  
Көть корсьны кута лунын.

Тэ дзикөдз вошан-сунан,  
И өтнам коля ме.

Но кыськө төвру петіс  
Да русө тракйис-летіс,  
И югдіс вольной светыс,  
И аддзи: орчөн тэ.

### А юыс — шөрас

Му ловзян кадыс воис водз  
Но ён на төлыс.  
Мый вөлі, лёкөдны оз позь,  
Мый вөлі — вөлі.

Тэ мөдлапөлын корсян шуд,  
Ме — талапөлас.  
А юыс кывтөмысь оз сувт,  
А юыс — шөрас.

Тэ горзан, кинад өвтчигтыр,  
Мед пыжа волө.  
А юыс шөрас кывтө пыр,  
Кызд кольём олөм.

### Вөла

Бытьё еджыд пальто пөла,  
Пуяс вылын лымлөн пласт.  
Паськыд туйөд лэбө вөла,  
Тільгун шыа яг и рас.

Кора доддын сөмын кыкөн,  
Кора доддын сөмын шуд.

Эн жө, төлөй, сійөс тшыкөд,  
Эн жө көдзыд кинад кут.

Налы шоньд тайө здукө,  
Налөн сьөлөм пымсьыс-пым...  
Быттьө кыптө байдөг чукөр,—  
Вөв кок улысь лэбзьө лым.

### Помнита

Сэки мыйлакө сёрнитны полім,  
Гашкө-й, висьтавыны нинөм эз ков.  
Сэки тэкөд ми быдлаө волім,  
Орччөн осьлаліг кыпөдім лов.

Тэнсьыд помнита небыдик паръяс,  
Ыджыд синъясысь енэжлысь лөз.  
Сэки потісны пуяслөн гаръяс,  
Мича нюмаось вөліны йөз.

Гажа тулысыс сэки зэв вөлі,  
Ставы нюмъяліс югыд апрель.  
Тэкөд школасянь осьлалім чөла,  
Тэнсьыд нуи ме ыджыд портфель.

\* \* \*

Сідз мян олөманым лоис,  
Мый колис сөмын казьтантор.  
Мен усьлө вежөрө став воис,  
Тэ мекөд орччөн вөлін кор.

Ог мыжав некор дзик ме тэнө,  
Мый вөчин меным ыджыд дой:

Öд колин меным мөвпа вой,  
А дойсö кыздикö да вена.

### Сы дорö

Дзурс пемыд вой. Ни төлысь-кодзув.  
Мый синмад бытшкас, он и төд.  
А туйыс, кузь да сьöкыд, водзын,  
Мед туй кө вöлі, а öд сьöрт.

И кутшöм чöртыс тойліс меным,  
Мед лойны пидзöсöдзным няйт?  
Öд позис туйсö луннас венны,  
Не öні, быттö вошис сайд.

Мед, шуам, мыйкö лёктор лоис,  
Мед, шуам, тэрмасянатор,  
А то öд письмөтор и воис:  
«Ме виччыся. Көть водз, көть сёр».

И муна, радпырысь на муна,  
Дзик öні туй шöрас көть вод.  
Но, мыйöн сылөн сывйö суна,  
Ме лоа таысь пöt и код.

И унаысь на мунöм лоö,  
Көть петас зэр, көть петас слöt.  
Да, мортыд, муслуныс кор воö,  
Сэк, вöлөм, падмөмтö оз төд.

### Мича ныв

Батыслөн да мамыслөн  
Быдмö мича ныв.

Лөсялө зэв сямыслы  
Вежавидзан кыв.

Енакодъ нин төдчоны  
Морөсас кык мыльк.  
Окота нин вöччыны,  
Кывны рытъязык.

Абу нывлөн полöмыс,  
Лөксö оз на төд.  
Чайтö: мича олöмыс,  
Нинöм абу съод.

Оз на төд, мый муслунлы  
Частö волö пом,  
Сьөлöмъяс мый куслöны,  
Кöть и ачыд том.

Би вылö моз сетчöмыс  
Артмö бобув моз.  
Кильчö вылысь лэччö нин,  
Сотчас али оз?..

### Дзоридзалис льöм

Помнитан, кызд дзоридзалис льöм?  
Вöли гөгөр веж да ежыд рöм.  
Асылöдзыс войыс вöли том,  
Окалі ме тэнсьыд шоныд вом.  
Помнита, мый адзим сёрни лад,  
Но ог помнит, мыйта колис кад.

Со и бара дзоридзалö льöм,  
Бара гөгөр тулысылөн рöм.  
Льöм пу дорас вайис менö кок.

Чунь моз өтнам. Талун тэ эн лок.  
Мый нө вöчан? Эн кө лок и мед,  
Оз на тэтөг пемды вöльной свет.

Эн, эн эскы, ен могысьөн, мен,  
Менам шонді, менам өти ен.  
Тэд да меным дзоридзалө льөм,  
Тэд да меным олөмыслөн рөм.

## Свадьба

### 1.

Свадьба улич вылө петіс,  
Дзескыд лои жыр.  
Бара гудөк гөлөс сетіс,  
Йөкты да эн пыр.

Орччөн сулалөны кыкөн,  
Вомныс — ваш на ваш:  
Верөс — олөмыслөн пыкөд,  
Гөтыр — олан гаж.

Мед жө енмыс найөс видзас,  
Лоас сьөлөм пым.  
Нылыс кодь жө, еджыд, мича,  
Усьө небыд лым.

### 2.

Лөсьыд зыкөн, ыджыд гажөн  
Өдйө коліс свадьба лун.  
Водалісны ставыс важөн,  
Личкис жө тай сэссия ун.

Но а сваттяслы өні  
Воис кыв кутана кад:  
Пызан вылысь идралёны,  
Чышкалёны сэт и тат.

Вель на лөсялөмөдз ылын,  
Көть и өні өти рөд.  
Но өд, кызди пи да нылыс,  
Мусмасны на, сійө-й төд.

### Индөд

Талун весиг йөрш эз шед.  
Гөтыр шуө: «Лешсян сөмын...»  
А ме сылы: «Но и мед.  
Меным любө ывла рөмыс.

Коркө кыкөн ветлам вай  
Чөскыд көра енэж улас.  
Юам сэтөра сук чай,  
Шедыштас кө, юква пулам.

Век нин гожйөдчынтап сэн,  
Тані, гортын олөм дорысь...»  
«Аски ваям тэкөд корөсь»,—  
Гөтыр индөд сетіс мен.

### Нуөд менө

Нуөд менө вай, нуөд:  
Гортысь мустөммис жыр.  
Ветлам кызьяслөн дзуө,  
Раскөд ветлөдлам дыр.

Пөся топөдлам найөс  
Да и асьнымөс тшөтш.  
Сэни, раскас, и райыс,  
Сэни муслунлөн көдж.

Тэа-меалы вояс  
Лыддяс мудзтөдзыс көк.  
Юмов чөдөс сэсь сёям,  
Юам ёлыслысь нөк.

Сэни миянлы сылас  
Лэбач котырлөн хор.  
Сэни бурджыка кылам:  
Миян муслун оз ор.

Кокыд көтасяс мыйөн,  
Өзта бинур ме тэд.  
Билысь жарсө ми кыям,  
Сьөлөм өзйис жө мед.

Нуөд менө вай, нуөд:  
Гортысь мустөммис жыр.  
Ветлам кызьяслөн дзуө,  
Раскөд ветлөдлам дыр.

\* \* \*

Эн вай вежөкты менө,  
Вермас лоны мөй сідз,  
Мый ме эновта тэнө,  
Сьөлөм пытшкын ог видз?

Меным медся өд колө,  
Медым нюмъялин пыр.  
Тэнө воштөмысь пола,  
Тэнө, беринөсь ныр.

Некод миянӧс, чайта,  
Некор юкысь оз сюр.  
Сідзкӧ, донаӧй, вай тэ  
Эн жӧ весьшӧрӧ дур.

Миян водзын на ставыс,  
Водзын шудыс и шог.  
Уна кывтас на ваыс,  
Уна тӧдлам на мог.

Йӧзыс юксьӧны, овлӧ,  
Но ӧд огӧ жӧ ми.  
Тэ ӧд челядьӧс новлін,  
Со тай кыкӧн — кык пи.

Эн вай вежӧкты менӧ,  
Гажыд эз ӧмӧй быр?  
Тэӧ радейта, тэӧ,  
Тэӧ, беринӧсь ныр.

### Эг вунӧд

Эг вунӧд тэӧ ме, эг вунӧд,  
Но кувтӧдз ӧмӧй пӧжны дой?  
Зэв мича прӧстӧ тувсов луныс,  
Зэв югыд прӧстӧ зэрлӧн войт.

Зэв кузя прӧстӧ кӧкыс кӧкӧ,  
И прӧстӧ дзоридзалӧ сад.  
И прӧстӧ ачым — том на сӧкӧл,  
И абу шогсьынысӧ кад.

И прӧстӧ казтыштсис, мый вӧлі  
Дзик татшӧм коркӧ тувсов лун,  
Кор тэкод ветлім мӧдлапӧлӧ,  
И чайтсьӧ: наметсьыд эг вун.

И прѣстѣ, керка весьтѣд муниг,  
Мен ыстѣ нылан сьѣлѣм мич.  
И прѣстѣ, веськыда кѣ шуны,  
Мен талун мыйкѣ да не сѣдз.

\* \* \*

Сьѣлѣм вельмѣма ньѣжмыдѣн лоны,  
Абу важся моз пессьѣмла дон,  
Но ме радейтны кѣсья на ѣна,  
Быттѣ сийѣс ни кѣлуйтѣм зон.

Кѣсья котравны сю потшѣс помѣ,  
Еджыд платтѣѣа сулалан кѣн.  
Бара кылі ме ачымѣс томѣн,  
Кодыр лѣбалѣ тѣпольлѣн гѣн.

\* \* \*

Ѡта-мѣдлы сѣтан ньылыд кыв,  
Видзѣдан да, бурасьѣ нин сьѣлѣм.  
...Ѡти луно гѣгѣрвоан, вѣлѣм:  
Муслун — тайѣ абу сѣмын сыв.

**Мам**

**П о э м а**

**1.**

Гѣрдѣн вевттѣм ыджыд пызан сайын  
Кѣть эн некор пукавлы тѣ, мам,

Но өд сөмын бур тэ йөзлы вайин,  
Медводз меным сетін олан сям.

Ставсө ог, но унатор ме төда,  
Казьтылөмөй, чайта, лоө стөч.  
Вежөртны кор пиөй менам мөдас,  
Висьтала сэк, кутшөм сылөн пөч.

Висьтала, кызд дядь водзын тэ олін,  
Ставсө вөчин, вөлін көть зэв нэр.  
Керка помын воськов вөчны полін,  
Дас квайт арсянь мунін лэдзны кер.

Пусянь нуөдз лымйөдыс тэ уйин,  
Эз тай сийө ачыс нөр ни пөр.  
Рытладорыс вөлін быттьө шуйөн:  
Сэтшөм ёна мудзлін, сьөлөмшөр.

Тулысьясыс эз жө вөвны маөн,  
Моль бөж вөтлін верстьө йөзкөд рад.  
Багыр мозыд сунлін көдзыд ваө...  
Сэтшөм вөлі, шулін, сэки кад.

Шудаджыкөн вөлі тэныд гөжөм,  
Югдыліс кор гегдөм ывлавыв.  
Помнитө на керөс йывса пожөм  
Тэнсьыд сывтө, тэнсьыд сыланкыв.

Сөмын этша татшөм здукуыс вөлі,  
Страдна кадө ньөти дзик эз сюр:  
Кузь покосө петлін мөдлапөлын,  
Жуявтөдзыд ваявлін тэ юр.

Эз и кокньөд лышкыд ань кодь арыс,  
Сьөкыд уджыс йирис, кызди гаг.  
Некор тэ эн шойччөм йылысь гарышт,  
Мөскөс лэдзтөдз вайлін нестер тшак.

## 2.

Гашкө-й, югдiс, мамук, тэнад олөм,  
Гашкө-й, дойтө нуис визув ва,  
Гашкө-й, бырис надзөникөн полөм,  
Эз кө быттө пансыы друг война.

Парма пытша юлөн берег вылө  
Пожөм керйысь лэптөм ичөт сикт  
Лөньюдiс сэк сералөм и сьылөм,  
Быттө вошис пемыд вöрас дзик.

Бөръя эбөс кыскис помтөм луныс,  
Кача няньысь пөтөслун эз вөв.  
Танi вөли фронт жө, збыль кө шуны,  
Көть эз лэбав весьтөд биа ньөв.

Ставсө фронтлы! Ставсө мездлун вылө!  
Көть тэ кув, а норма ассьыд вөч!  
Гөр и көдз, и керсө лэдз да кылөд,  
Көть и зэв на небыд тэнад гөч.

Өтчыд вöрын увйыс сiдзи вартiс —  
Муртса мөдар югыдас эн мун.  
Омөльтчин да лоин быттө сартас,  
Он и помнит, мыйта куйлин лун.

Мөдысь йи куд улөдзыс нин волин,  
Эз кө йөзыс вөвны, пөдин, дерт.  
Эськө, мамук, сы мында и олин,  
Сы мында и төдлин вөльнөй свет.

Ок и ёна уджыс сэки сөлис:  
Дядь семьялы отсалин өд век.  
Ставыс вөли, мамук, ставыс вөли,  
Ловзылан и кувлан вөли сэк.

## 3.

Коді вөлі кулысь, сійө куліс,  
 Кадысь водзсө кулысь нэм оз вун.  
 Воис жө тай, воис жө тай тулыс,  
 Коді вайис сиктө шуда лун.

Воис кад, и гөлөс сетіс гудөк,  
 Нуөдіс, мед асылөдз он во.  
 Тэ сэк, мамук, тшөтш жө вөлін шуда,  
 Тшөтш жө мунлін, лоана мый — ло.

Радейтан кө, сьөлөм небыд лоө...  
 Кызь кык арөс буретш тыртін тэ.  
 Война бөрсә сьөкыд на мөд воө  
 Сэссия чужи вольной светас ме.

Пывсян джоджын, пемыдінын чужи,  
 Эз тай ковмы, мамө, дядьлөн жыр.  
 Чужйыштчи да гөлөс сетны кужи,  
 Медым менө шонтін пырысь-пыр.

Тэ и босьтін, сьөлөм дінад вайин,  
 Ме и ланьті, пыксьыны эг мөд.  
 А тэ шудсьыс, шогсьыс өти сайын,  
 Гусьөн бөрдін, быттьө аддзин вөт.

## 4.

Кадыс сэки вель на вөлі сьөкыд:  
 Кокын — көті, кынөмын — гур-гур.  
 Сэки, мамө, суис тэнө рөкыд,  
 Кызь куимөн дзормис тэнад юр.

Кодкө слава тэ вылө сэк лэптіс  
 (Эз тай сылөн, пежлөн, юрыс усь),

Быттьö, мамö, сюялн тэ зэптад  
Гусьöникöн гумла вылысь тусь.

Таысь тэнö судитны пö колö,  
Дзескыднö нуны пырысь-пыр.  
Сидзи-й лои: пузувтисны олöм,  
Йöткыштисны, кöни пемыд жыр.

Не кö ме, эз лэдзны регыд сэтысь:  
Сэк öд меным арöс на эз вöв.  
Вөлöма на бурыс вöльной светас:  
Локтн гортö — пуксьö вöли төв.

## 5.

Эз и вевъяв шоналыштны сьölöм,  
Эз и вевъяв кокнялыштны лов,  
Кильчö помын виччысьö нин вөлöм  
Тэнö шогыс, сэсся кöть эн ов.

Предын олысь дядьыд крапкис тэныд:  
«Кытчö гажыд чурка сорнад пет!»  
Мамыд эськö волис сыкöд венö,  
Сöмын тайö нинöмсö эз сет.

Аттö йöзлы, сибöдисны тэнö,  
Примитис, кыз нылöс, öти дед.  
Гöтырыс сэк босьтчис видзны менö,  
Йöлөн вердис, öдйö быдми мед.

Тадзи-й олим, крепитчим да олим  
Батьтöм мам да батьтöм ичöt пи.  
Бур йöз динас пукалыштны волим,  
Пач вом дорын төвнас шонтим ки.

Сэсся керка лэптыны тэ шуин,  
Коркö «даса» дзеблн, коркö руб.

Прамой йөзсө пөрөдчыны нуин,  
Прамой йөзыс тшуписны тэд сруб.

Воис кад, и школао ме муні,  
Йөзсыс лёкджык паськөма эг вөв.  
«Чуркаон» кө лысьтис кодкө шуны,  
Сэки эг жө пукав шы ни төв.

Тадзи гортысь помалі ме школа,  
Сэсся бокин велөдчи вель дыр.  
Гортө вөлі гожомнас и вола,  
Тэкөд вөлі страдуйтам ми пыр.

Казялі ме, мамук, өти сайын:  
Пыдди пунктис тэнө чужан сикт.  
Аслад сямөн шедөдін тэ тайөс,  
Аслад уджөн шедөдін тэ дзик.

«Но и баба! — йөзыс вөлі шуө. —  
Өти здук өд весьшөрө оз ов».  
Збыльысь, тэнад ставыс вөлі пуө,  
Тэнад том на вөлі стать да лов.

Но эн вайөд дядьөн шуан мортөс,  
Мыйла эн, эг юась и ог төд.  
Ачым лои ыджыдөн ас гортын,  
Медым водзө паськөдны ас рөд.

## 6.

Уна-уна во нин сэксянь лэбис —  
Квайтымынысь петис тэныд со.  
Кадыс ставсө шыльөдіс да дзебис,  
Но өд нинөм паметькөд эз ло.

Мамук, тэнсьыд велөдча ме овны,  
Медым менам мортлунөй эз быр.

Овлö сьöкыд, но ог усьлы ловнам,  
Век жö бурлань муна, мамук, пыр.

Сьöкыд шуны, кутшöм водзын олöм:  
Вöльнöй светас тыш бöрся со тыш.  
Но öд абу тэлöн моз жö полöм,  
Но öд абу няр ни абу дыш.

Со и, мамук, асыв кутис воны,  
Казьтылі ме тэнö быдса вой.  
Талун луныс мича вермас лоны,  
Мед жö нинöм сьölöмтö оз дойд.





# ЮРИНДАЛЫСЬ

## Олам тані

Туйяс . . . . .	3
Чолөм, чужан му! . . . . .	3
Дона серпас . . . . .	4
Шуд . . . . .	4
Лов . . . . .	5
Олам тані . . . . .	5
Гортын . . . . .	6
Чужан сиктын . . . . .	7
«Висьтав чужан муой йылысь...» . . . . .	7
Йитөд . . . . .	8
Пилот . . . . .	8
Габов грездын . . . . .	9
Югыд шог . . . . .	9
Лөнъ . . . . .	10
Вөрсә ю . . . . .	11
Мыр . . . . .	11
Водз тулыс . . . . .	11
«Таво тулыс оз нинөмөн торъяв...» . . . . .	12
Та вөсна и чужи . . . . .	12
Мича лун . . . . .	13
Югыд зэр . . . . .	13
Шонді петөм бөрын . . . . .	15
Сы вылө и ми . . . . .	15
Гожөм . . . . .	16
Пример . . . . .	16
Томъяслөн страдна . . . . .	17
Томлун . . . . .	17
Коммунистьяс . . . . .	18
«Таво зэрыс ёнасө эз торкав...» . . . . .	18
Видз вылын . . . . .	19
Рыт . . . . .	19
Гожөм пом . . . . .	20
Көдздөдіс . . . . .	20
Менам кад . . . . .	21

Эновтны позьтём удж . . . . .	21
Праздник . . . . .	22
Мамö воис . . . . .	22
Меддона морт . . . . .	24
Меддона кыв . . . . .	24
Эскöм . . . . .	24
Аскöд öтнамön . . . . .	25
Асыв . . . . .	25
Турунла ветлём . . . . .	26
Йи вылын . . . . .	27
Тöвся сикт . . . . .	27
Октябрь пом . . . . .	27
«Кадыс петöма лун шöрысь...» . . . . .	28
«Лымйыс сапкö...» . . . . .	29
Пывсян . . . . .	29
Пач . . . . .	30
Эжöм керка . . . . .	31
Вöвлём вөлöга . . . . .	31
Кöтi . . . . .	32

## Юалём

Победа . . . . .	33
Война эз волы . . . . .	34
Ветеран . . . . .	34
«Ылö-ылö коли кадыс тайö...» . . . . .	35
Сьыланкыв . . . . .	35
Вöv . . . . .	36
Дед да внук . . . . .	36
Подув . . . . .	37
Öшыбка оз ло . . . . .	37
Фильм бöрын . . . . .	38
Ковмас кö . . . . .	38
«И öнi, и пöрыся-нэмö...» . . . . .	39
Кызьöд нэм . . . . .	39
Бать да пи . . . . .	40
Öтувъялун . . . . .	41
Оласног . . . . .	42
Вунöдчис . . . . .	45
Пыкöд . . . . .	45
Керка . . . . .	46
Прокö дед . . . . .	46
Ворсысьяс . . . . .	47
Коркöся пес вöчöм . . . . .	48

Пилӧн челядьдыр . . . . .	49
Муслун . . . . .	50
Войын . . . . .	50
Гӧтыр йылысь . . . . .	50
Друг . . . . .	51
Бур вӧчысьяслы . . . . .	52
Больничаын . . . . .	52
Пожӧм . . . . .	53
Кӧсйӧм . . . . .	53
Личӧдіс . . . . .	54
Востым . . . . .	54
«Вида ачымӧс сыысь...» . . . . .	55
Узьтӧм вой . . . . .	55
Юалӧм . . . . .	56
Вӧр-ва вӧсна . . . . .	57
Йӧрапи . . . . .	57
Морт да ю . . . . .	58
Олӧмыс — тыш . . . . .	58
Ош . . . . .	59
Вӧвъяс . . . . .	59
Бобувъяс . . . . .	60
Пос . . . . .	60
Кӧдзысь . . . . .	61
Вуграсысь . . . . .	61
«Парма шӧрас дыр нин оліс...» . . . . .	62
Пуяс . . . . .	62
Дӧрӧм . . . . .	63
Мичлун . . . . .	63
Кывбурлы подув . . . . .	63

### Бара вӧсьӧма гаж

«Нывлӧн мичлуныс бырӧ...» . . . . .	65
Виктор Савинӧс лыддьӧм бӧрын . . . . .	65
«Юргӧ ывлаын сьылӧм...» . . . . .	66
Йӧктыштам да сьылыштам . . . . .	67
Водзті да ӧні . . . . .	67
Менам тулыс . . . . .	68
Мӧдлапӧлын — талапӧлын . . . . .	69
Ру . . . . .	69
А юыс — шӧрас . . . . .	70
Вӧла . . . . .	70
Помнита . . . . .	71
«Сідз миян олӧманым лӧис...» . . . . .	71

Сы дорö . . . . .	72
Мича ныв . . . . .	72
Дзоридзалис льöм . . . . .	73
Свадьба . . . . .	74
Индöд . . . . .	75
Нуд менö . . . . .	75
«Эн вай вежöкты менö...» . . . . .	76
Эг вунöд . . . . .	77
«Сьöлöм вельмöма ньöжмыдöн лоны...» . . . . .	78
«Öта-мöдлы сетан ньылыд кыв...» . . . . .	78
Мам. <i>Поэма</i> . . . . .	78



**Василий Григорьевич Лодыгин**

**ПОГОЖИЙ ДЕНЬ**

*Стихотворения, поэма*

*На коми языке*

**Художник Е. П. Борисевич**

Редактор В. А. Попов, Художественный редактор В. Б. Осипов.  
Технический редактор А. Н. Вишнева. Корректор Т. А. Гудырева.

**ИБ № 965**

Сдано в набор 04.02.86. Подписано к печати 16.10.86. Ц04501. Формат 70×90<sup>1</sup>/<sub>32</sub>. Бумага № 1. Гарнитура «Обыкновенная новая». Печать офсетная. Усл. печ. л. 3,21; усл. кр.-отт. 3,36; уч.-изд. л. 3,34. Тираж 1000. Заказ № 6869. Цена 35 коп. Коми книжное издательство. 167610, Сыктывкар, ул. Карла Маркса, 229.

Республиканская типография Государственного комитета Коми АССР по делам издательств, полиграфии и книжной торговли. 167610, Сыктывкар, ул. Первомайская, 70.



\*\*\*

35 к.

Коми книжной издательство 1986